



ماس كهرجى

تأليف : أحمد العباسى

iCulture

Empowering creative minds

الشخصيات حسب الظهور



مجموعة من اهل القرية

علام : يعمل فى مكتب سفريات

وكيل النيابة

فهيم وحسنين ومرزوق : فلاحين من اهل القرية

بسيونى الاعرج : والد سلامة

سلامة : شاب متعلم فى مقتبل العمر

صابر : شاب أبله

الشيخ حامد : امام الجامع

راوية : خطيبة سلامة

هارشا : سيدة هندية تتسم بالرشاقة والخفة

عليان : شخص خليجى

سيكولالى : فتاة سيريلانكية

أم جلال الداية

عطية وحسنى : من اهل البلد العائدين من السفر

iCulture

اللوحة الأولى

(قرية ميت أبو العدل وفى الخلفية تظهر منازل القرية وقد اشتعل الحريق فى واحد منها وجموع من الناس يحاولون اطفاء الحريق فى ظل حالة من الهرج والمرج الى أن يظهر وكيل النيابة ومعه علام)

رجل (1) : الحقونا يا ناس .. يا عالم يا هووه هنفضل كده لحد إمتى ??? حد يشوف لنا حل !!

رجل (2) : نطفى الحريقة فى البيت من دول ما يعديش يومين ونلاقيها والعة فى بيت تانى ... اللطف من عندك يا رب

علام : بقى كل يوم والتانى بيت فى البلد هيلوع يا ولاد .. ده إيه البلد اللي عليها غضب من ربنا دى ... لا حول ولا قوة إلا بالله .. إحنا بقالنا على الحال ده أكثر من 3 شهور .. ساعدونا يا سعادة البية شوفوا لنا حل .. إحنا خلاص ماعدناش عارفين نعيش فى البلد دى ...

وكيل النيابة : (يملئ الكاتب) وقد انتقلنا نحن موسى عبد الرحيم العوضى وكيل النائب العام إلى قرية ميت أبو العدل لمعاينة المنازل التى أحرقت من قبل وكذلك معاينة المنزل الذى نشبت فيه النيران صباح اليوم ... إسمك وسنك ومهنتك

علام : علام السيد مصطفى علام السن 55 سنة ... شغال فى مكتب سفريات

وكيل النيابة : وبتشتغل ايه يعنى فى مكتب السفريات ??

علام : بأشوف العمالة اللي عايزة تسافر من البلد وأبعثها للمكتب .. وربك بيرزق باللى فيه النصيب

وكيل النيابة : ايه معلوماتك يا علام عن الحرايق اللي بتحصل فى البلد ??

علام : والله يا سعادة البية كل يوم بيت بيولع شكل .. والغريبة إنه بيولع من جوه مش من بره .. بصراحة يا باشا

الموضوع شكله كده داخل فيه العفاريت

وكيل النيابة : عفاريت !!! ليه بتقول كده

علام : يا سيادة الوكيل بالعقل كده .. ما هو لو إنسى كانت النار ولعت من بره البيت .. إنما دى بتولع من جوه ...

وبعدين بيوت بيوت مش كل البيوت ... يبقى أكيد حد عامل عمل لأصحاب البيوت دى ..

وكيل النيابة : طب اقعد يا علام واحكيلى الحكاية من الأول وبالراحة

علام : بص يا سعادة الباشا أنا هأحيلك الحكاية من ساعة البلد ما اتقلب حالها من بعد اللي عملته البت راوية منها لله

وكيل النيابة : وعملت إيه راوية !!!

علام : اللي عملته راوية مش قليل .. ضر أهل البلد كلهم وأولهم أنا .. هأقولك الحكاية من الأول يا باشا ..

iCulture

اللوحة الثانية

(منزل بسيونى الأعرج الذى يوحى بفقر صاحبه)

(يظهر علام وفهيم وحسنين وبسيونى الأعرج الذى يبدو عليه أنه يعانى من إعاقة العرج فى إحدى رجليه)

علام : مبروك يا بسيونى يا أعرج .. سلامة ابنك صبر ونال .. صحيح استنى أكثر من سنة إنما ربنا عوضه ..جاله
أحسن عقد عمل شافته ميت أبو العدل
فهيم : يا سلام !!!! أحسن عقد !!!!
بسيونى : إقراه لهم يا علام يمكن مش مصدقين ولا حاجة
علام : وقد اتفق الطرف الأول الشيخ عليان الطرطورى صاحب مؤسسة الحسنات يذهبن السيئات لمعامل وتحاليل
عينات الخرسانة الجاهزة والجيولوجيا على أن يعمل لديه الطرف الثانى الأستاذ سلامة بسيونى الأعرج بمهنة
فنى معامل وباحث جيولوجى مقابل الراتب المذكور أدناه
فهيم : طب والراتب المذكور أدناه ده هنعرفه إزاي ؟؟؟؟
حسنين : إيوه صح .. ماهو لازم صاحب الشغل يقول لنا من أولها ... رد بقى يا فالج ..
علام : ماتخافش يا ناصح منك له الأستاذ سلامة واخد أحسن راتب وصل بلدنا لغاية دلوقت مفيش واحد فى ميت أبو
العدل بحالها خاد الراتب ده
فهيم : طب الراتب واطمنا عليه .. انما موضوع باحث ده شاغل دماغى حبتين !!
بسيونى : سلامة دماغك يا فهيم ...الباحث مش عاجبك فى إيه ؟!
فهيم : يعنى هما بيدوله الراتب الكبير ده عشان الحاجة اللى بيبحث عليها .. طب افرض بقى مالفهاش ؟؟؟؟
حسنين : إيوه صح ... رد بقى يا فالج ..
علام : مالفهاش !! الله يخرب بيوتكم هو بيدور على عيلة تايهة منه !! ده باحث علمى جيولوجى يا جهلة يعنى بيعمل
تحاليل على العينات اللى بتجيله وبيبحث العينة ويطلع النتيجة .. هناك كل حاجة بنظام وبدقة مش زيكوا يا
فلاحين يا متخلفين
فهيم : يخرب عقلك يا واد يا بسيونى بقى ابنك بتاع تحاليل ومخبى وسايينا مرضانين من يومها
حسنين : شفت الرجل الكهين... لا وايه عامل نفسه عيان ..بس على مين ... أنى هأروح أجيب حاجة من الدار
وراجع تانى

(يخرج حسنين)

علام : يا سلام أهو انت كده فى آخر أيام الفقر يا بسيونى يا أعرج انت وعيالك .. إوصف لنا احساسك وانت على
أبواب الغنى الفاحش

بسيونى : بصراحة حاسس ان أنى كتير عليكو

فهيم : يعنى ايه يا بسيونى يا أعرج

بسيونى : زى ما بأقولك كده ..من بعد ما عرفت ان ابنى جاله أكبر عقد فى البلد حسيت انى قيمتى زادت قوى وان انتم
مش من مقامى ومش طايق أبص فى وش حد فيكم
علام : ده احساس طبيعى يا جماعة ماتستغربوش... اللى فيه بسيونى الأعرج مش قليل ... بسيونى دلوقت فى لحظة
فارقة .. نهاية الفقر وبداية الغنى الفاحش
(يدخل رجل 1)

رجل (1) : الحق يا بسيونى الجاموسة بتاعتك فى الغيط بقالها يومين لا قدامها أكل ولا مية ...الجاموسة هتموت يا
بسيونى

بسيونى : تموت فى داهية ماعدتش لازمانى .. آل جاموسة آل ... بقى بسيونى أبو الأستاذ سلامة الباحث الجالوجى
يروح لجاموسة عشان يعلفها !!! احترم نفسك يا وله.. والزم حدودك واعرف انت بتكلم مين
رجل (1) : طب والغيط يا بسيونى ???

بسيونى : هبور ه ... غيط ايه يا أبو غيط .. أنى عديت المرحلة دى خلاص .. وبالمره الحمار اللى مربوط جوه تعالى
أفكهولك وخده .. أنى حاسس انه فيه شبه منك .. هو قريبك ياله ؟؟

رجل (1) :والله عمرى ما شفته غير هنا يا بسيونى

بسيونى : جاتكم البلا ... فلاحين هم (يخرج بسيونى ورجل 1)
(يدخل سلامة ومعه صابر)

سلامة : خلاص بقى يا صابر إرحمنى بقالك ساعتين شبطان فى ومش فاهم انت عايز ايه !!!

صابر : (يبدو أنه أبله ويتكلم بصعوبة والكلام غير مفهوم بالكامل) (الأمانة سافر ... أبر اجوز آوية) (سلامة
يسافر ... صابر يتجوز راوية)

سلامة : حد يترجم لى يا ناس مش فاهم حاجة منه

علام : بس يا صابر اختشى كده عيب

صابر : (يتمرد ويبدى اعتراضه على كلام علام) (أبر حب آوية .. الأمانة سافر .. أبر اجوز آوية) (صابر يبحب
راوية .. لما سلامة يسافر يبقى صابر يتجوز راوية)

علام : يا صابر مش كده احترم نفسك

سلامة : طب بس فهمنى هو بيقول ايه

علام : ياعم ماتخدش على كلامه ده عيل عبيط

سلامة : والعبيط ده عاوز منى ايه ؟؟

علام : بيقولك يا سيدى مادام هتسافر وتسبب راوية خلاص يتجوزها هو

سلامة : راوية مين !!!

علام : خطيبتك ... هو فى راوية غيرها ..

سلامة : يا نهارك أسود يا صابر الكلب ... والله لولا انك أهبل ومش فاهم اللى بتقوله كنت دفنتك مطرحك

علام : يا عم ماتحطش فى بالك ده أهبل سيبيك منه

سلامة : ده كلام يقوله ... انت عارف راوية دى بالنسبة لى ايه ... دى خطيبتى وحببىتى ... دى أمى وأبويا .. دى دنيتى كلها (يحدث صابر) انت عارف لو عدت تجيب سيرتها على لسانك هأقطعوهوك وتعيش من غير لسان

صابر : (اش مهم .. اش عايزه) (مش مهم مش عايزه)

فهيم : أنى نفسى فى طلب واحد بس منك يا أستاذ سلامة لما توصل هناك

سلامة : أوامر يا عم فهيم

فهيم : انى عايز صورة (سفلى) مع الكعبة

سلامة : حاضر أول ما أوصل هأتصور مع الكعبة سفلى وأبعثهاك

فهيم : لأ ... أنى عايز (السفلى) يبقى أنى مع الكعبة

سلامة : ازاي بس يا عم فهيم .. هو أنا اللي هسافر ولا إنت !!!

فهيم : لأ انت طبعا .. بس أنى عامل حسابى على كل حاجة .. (يعطيه الموبيل) خذ

سلامة : ايه ده ؟!!!!

فهيم : الموبيل بتاعى ... أظن كده ماعدش لك حجة ...

سلامة : يارب صبرنى .. حاضر أول ما أوصل هصورك سفلى من موبيلك وأبعثهاك علطول .. عينيه يا عم فهيم

(يدخل حسنين)

حسين : أنى كمان لى طلب عندك يا سلامة ولو انى واخذ على خاطرى منك انت وأبوك

سلامة : ليه بس يا عم حسنين ؟!!!

حسين : مش كنت تقول انك بتاع تحاليل

سلامة : تحاليل ؟!!!!!!

حسين : علام قالنا على كل حاجة ... عموما لحوقة ... امسك دى (يعطيه زجاجة صغيرة) دى خلى بالك منها ..

تخليها ملازماك علطول لا تضيع منك خسارة .. أقولك حطها فى جيبك بدل ما تنساها هنا ولا هنا

سلامة : هدية مقبولة يا عم حسنين .. دى ايه بقى ؟؟ يا ترى حجاب ده ولا حاجة مبروكة من ريحتك

حسين : دقيقة واحدة زمان مرأتى ربنا سهلها لها أجيب إزاتها وأجى

سلامة : سهلها لها ؟!!!! ليه يا عم حسنين مالها ؟؟؟

حسين : عندها إمساك ... من ساعتها فى الحمام عشان تجيب العينة مش عارفة يا ولداه

سلامة : عينة ؟!!! هى إيه اللي فى جيبى دى يا عم حسنين ؟!!!!

حسين : دى عينة براز أصل بعيد عنك بقالى شهرين المغص مش سايبنى وقالولى لازم تحلل إنت ومراتك ...

ربنا يجعل فى إيدك الشفا وتطمنا

سلامة : الله يخرّب بيتك يا علام إنت قتلهم إيه ؟!!!

حسين : إوعى تسافر إلا لما مرأتى ربنا يجبرها

سلامة : لأ إزاي .. ودى تيجى ... إظمن يا عم حسنين .. أنا هأكلهم فى المطار يأجلوا طلوع الطيارة لغاية الحاجة ما

ربنا يفكهاها

حسين : ربنا يخليك لنا يا دكتور سلامة (يخرج حسنين)

علام : (يكلم سلامة) بأقولك ايه .. الشيخ حامد إمام الجامع كان عاوزك فى مسألة بس محرج شويتين

سلامة : هيجيب عينه هو كمان !!!

علام : عينه ايه يا راجل لأ .. تعالى يا شيخ حامد ماتتكشفش

(يدخل الشيخ حامد)

الشيخ حامد : أنا لى طلب عندك بس أمانة يبقى سر بينى وبينك

سلامة : ماتقلقش يا شيخنا سرى فى الحفظ والصون

الشيخ حامد : أنى زى ما إنت عارف متخرج من الأزهر بقالى 25 سنة .. بس عمرى ما رحى الأراضى المقدسة

سلامة : ربنا يوعدك

الشيخ حامد : بصراحة أنى حاسس إن أنى بأصلى غلط .. وبأعلم أهل البلد الصلاة غلط ..

سلامة : غلط !!! معقول .. ده البلد كلها بتصلى وراك

الشيخ حامد : ما هو ده اللي مخلينى خايف ومرعوب .. أنا ما بيجيش لى نوم من كتر القلق يا أستاذ سلامة

سلامة : طب والحل

الشيخ حامد : أول ما توصل هناك تسأل وتفتينى فى الموضوع ده .. وماتتأخرش على فى الرد .. أنا قلقان قوى ..

عشان لو فيه تعديل ولا حاجة ألحق نفسى قبل ما أقابل وجه رب كريم

سلامة : حاضر يا شيخ حامد ولو إنك قلقتنى كده ... لما الصلاة مش متأكد منها إمال هنعمل إيه فى بقية المناسك !!!

الشيخ حامد : احنا هنبداً بالصلاة لكن بعون الله تعالى هتفتينى بعد كده فى كل حاجة ... صحيح إحنا الأزهر لكن هنجى

إيه جنبهم .. دول أهل البلد ... والإسلام نازل عندهم مش عندنا

سلامة : ماشى يا شيخ حامد .. ربنا يعينا ويوفقنا

(تدخل راوية)

علام : أهلا يا راوية ... يالله يا جماعة خمسة كده سيبوا الراجل يسلم على خطيبته قبل ما يسافر

(يخرج الجميع ماعدا صابر وعلام)

سلامة : بيقولك خمسة كده .. إيه ياعم ركز شوية .. إنت أهبل مش أطرش ..

صابر : (بيدى إشارات وإنفعالات توحى بأنه سيظل معهم ولن يغادر) (لأ .. أنا مش إمشى)

علام : يا سلامة سيبه يعنى هو فاهم حاجة .. وبعدين حتى لو فاهم هو إنت ناوى على إيه ??? إوعى تقل عقلك وتخسر

دينك وتفكر تمسك إيديها ولا حاجة

سلامة : عيب يا أستاذ علام .. إنت كده بتشكك فى أخلاقى يا إما بتشكك فى أخلاق راوية .. وفى كلتا الحالتين أنا ما

أسمح لكش ...

iCulture

راويّة : بالراحة يا سلامة ما تسخنش قوى كده .. ده بيتكلم عن مسكة إيد !!!
علام : أهو كده تعجبني يا سلامة يا إبنى .. كده أمشى وأنا مطمئن على إيد راويّة ..
راويّة : (بسخرية) وأنا كده إطمنت على بختي يا أستاذ علام .. روح ربنا ما يحرمننا منك أبداً ...
(يخرج علام)
سلامة : راويّة ... يا راويّة
راويّة : سلامة .. يا سلامة
صابر : (آوية ... يا آوية) (راويّة .. يا راويّة)
راويّة : (تكلم صابر) يا أخويا روح إبعد عننا هي ناقصاك
سلامة : أنا حاسس إن أنا بهيم يا راويّة ...
صابر : (أنا أسس إن أنا بأيم يا آوية) (أنا حاسس إن أنا بهيم يا راويّة)
راويّة : لا .. ده أنا قاعدة في ذرية بقي .. بهيم ايه يا سلامة !!!?
سلامة : بأيم في حبك يا راويّة
راويّة : (بخجل) أه أصل افكرتها حاجة تانية
صابر : (يمسك يدها) آوية .. (يقبلها على الهواء)
راويّة : عاجبك اللي بيعمله صابر ده ...
سلامة : عمل ايه ؟؟
راويّة : مسك إيدي وعايز يبوسني
سلامة : سيبك منه ده عبيط
راويّة : ماهو لو شاف إيدي في إيد حد تاني ماكنش فكر يلمسها
سلامة : حد تني !!! حد مين يا راويّة !!! انتي تعرفي حد تاني !!!
راويّة : يا خبيتك القوية يا راويّة .. ياعم مش انت خطيبي ???
سلامة : طبعاً
راويّة : وهتسافر تشتغل .. يعني هتبعد بتاع سنة كده ولا حاجة
سلامة : ان شاء الله
راويّة : الله ينور عليك .. طيب مافيش حاجة كده أفكرك بيها .. يعني كل ما تهف على بالي أفكرك همسة .. لمسة ...
غلطة ... أي حاجة ..
سلامة : فهمتك يا لنيمة ..

راويّة : (تدفع صابر بيديها) يالله يا صابر إطراً من هنا دلوقت .. يمكن يعرف يغلط له غلطة ولا اتنين

(يتحرك صابر ناحية الباب ولكن يظل واقفاً لا يخرج)

سلامة : فاكرة يا راويّة يوم ما سافرنا مصر لوحدنا ...

راوية : فاكرة يا حبيبي ... يوم ما عزمتنى على السينما

سلامة : فاكرة يومها ايه اللي حصل ...

راوية : وده يوم يتنسى ... لأول مرة فى تاريخ السينما المصرية الكهرا بتقطع ومايكملوش الفيلم

سلامة : الناس اللي فى الحفلة دول كان حظهم وحش قوى ...

راوية : لأ يا خويا دول كلهم محظوظين ما عدا أنا ..

سلامة : ليه يا راوية بتقولى كده؟؟

راوية : كلهم فضلوا قاعدين ما اتحركوش من مكانهم انت الوحيد اللي أصريت اننا نمشى

سلامة : نقعد نعمل ايه والفيلم مش شغال ???

راوية : نعمل زيهم يا سلامة ... يعنى احنا أقل منهم فى ايه ..

سلامة : عموماً أنا هاأعوضك عن كل حاجة يا راويتي

راوية : بجد يا سلومتى

سلامة : طبعاً .. فاكرة بقى لما خرجنا من السينما جبت لك ايه ???

راوية : جزمة ... وبعد ما وصلنا هنا لقيتها ضيقة على ...

سلامة : (يخرج كيس به جزمة) أهو أنا بقى جيبك لك مقاسك .. ايه رأيك بقى فى التعويض ده

راوية : ربنا يعوض على يا حبيبي ... واد يا صابر

صابر : ايه ..

راوية : ما تمشيش .. ما عدتش فارقة .. وشوف لو فى حد بره عايز يجي دخله ... تصدق بالله

سلامة : ونعم بالله ياروحى ..

راوية : الواد صابر دهه بيقول أحسن منك

سلامة : بيقول !!! ده أحرص

راوية : يا حبيبي القوالة مش بالكلام .. يا خيبك الثقيلة يا راوية .. إلا قولى صحيح هو سيادتك ناوى ترجع بعد قد ايه

؟؟؟

سلامة : ما انتى عارفة ما حدش بيسافر من البلد ويرجع قبل سنتين على الأقل

راوية : بأقولك ايه ... هى سنة واحدة .. قسماً عظماً إذا ما اتجوزتنش بعد سنة ما هبقى ليك يا سلامة

سلامة : إزاي بس يا راوية أمال هتبقى لمين؟؟

راوية : هبقى للى هبقى له .. اعمل حسابك هى سنة ورحمة أمى ما تزيد ساعة واحدة

سلامة : طب والحل هاأعمل ايه دلوقت ...

صابر : (يعمل إشارات وحركات لسلامة معناها إنه يسافر ويبعد براحته ولا يهتم بكلامها) (خليك بلاحتك يا الأمة)

خليك براحتك يا سلامة) (ثم يلتفت لراوية ويبتسم ويضع يده على قلبه)

راوية : يا أخويا روح إنتيل إنت كمان هى ناقصة هبل ... أنا ماشية وهتكلمنى على النت ولا أخلاقك ماتسمحش لى

كمان

سلامة : لا ... ده انتى يظهر ما تعرفينيش كويس ... هأكلمك طبعاً .. أنا فى النت ما عنديش ياأما ارحمىنى .. بأقولك

ايه يا راوية هو لازم كاميرا ولا ممكن صوت بس ؟؟؟؟؟؟؟

راوية : يا لهوى ي ي ي



iCulture

10

Empowering creative minds

اللوحه الثالثه

(دولة خليجية وفي الخلفية يوجد مسجد وأمامه ساحة واسعة ويظهر عليان وسلامة)

عليان : والله سواقتك زين يا سلامة ..

سلامة : والله يا شيخ عليان عربياتكم هي اللي زين ... بس أنا نفسي أفهم ليه أصريت نوقف العربية وننزل هنا ..
بصراحة أنا عاوز أروح على المؤسسة بسرعة أنا حاسس ان أنا سخن على الشغل قوى مش عاوز أضيع ولا
دقيقة ..

عليان : ما تقلق يا راجل .. طول ما انت معي اعتبر نفسك بالدوام .. بس استنى اركن السيارة وارجعك وإذا هارشا
إيجت قولها تستنى ..

سلامة : هارشا !!! وإنت بتجيلك الهارشا دي كتير يا شيخ عليان ولا ايه !!!

عليان : لااااا .. هارشا دي مو مثل ما انت فاهم نهرش نهرش نهرش .. لااااا .. هارشا هذه هي السكرتيرة تبعي .. هي
هندية واسمها .. هارشا شاروخين

(يخرج عليان)

سلامة : (يتحدث مع نفسه) هارشا !!! هارشا يا شيخ عليان !! مالقتش غير هارشا تبقى سكرتيرتك .. عم ما مش
مهم الاسم .. المهم ماتكونش معدية .. (يهرش فى جسمه) ده ايه ده بقى !!!! يا ساتر يا رب .. ايه اللي
بيحصلى ده .. (مازال يهرش فى جسمه)

(تدخل هارشا على موسيقى هندية راقصة و هارشا هي سيدة هندية تتسم بالرشاقة والخفة)

هارشا : بُ ربهات سلامة ...

سلامة : ن م ؟!!!

هارشا : بُ ربهات .. سلامة ..

سلامة : صبرى برهات مين يا ستى .. أنا سلامة ..

هارشا : وأنا هارشا ..

سلامة : طب لما انتى هارشا وعارفة ان انا سلامة .. ايه بقى لازمته صبرى برهات .. وصبرى برهام .. والحركات دي
.. مابلاش شغل التلازيق ده ..

هارشا : صُ ربهات سلامة .. صب ربهات ..

سلامة : يادى النيلة .. يا بنتى انا سلامة .. سلامة .. مش صبرى برهات ..

هارشا : صب ربهات يعنى .. صباه الهير بالأربى سلامة ..

سلامة : صباه الهير !!! آه قصدك صباح الخير .. صباح النور ياستى ... الله .. إوعى تكونى هارشا الهندية ..

هارشا : ها سلامة .. ها (تهز رأسها بالموافقة مما يتضح لنا بأن (ها) تعنى نعم)

سلامة : طب معلش فى الكلمة .. ماتأخذنيش يعنى .. هارشا ده اسم ولا فعل ؟؟؟ (يهرش فى جسمه)

هارشا : ناھى .. ناھى .. ناھى .. (تھز راسھا بعلامة الرفض) ھارشا دھ اسمى .. ومعناه السعادة بالھندى مش معناه

اھرش اھرش بالأربى

سلامة : طيب الحمد لله طمنتينى .. كده الواحد يسلم وهو مطمئن .. (يسلم عليها) أهلا بيكى يا ستى ھارشا ھاتم ..

ھارشا : نمستى .. نمستى .. نمستى .. سلامة

سلامة : يمسيكى بنعيم الله .. يا أجمل ھارشا فى الھند كلها

ھارشا : بھوت شكريا .. سلامة .. بھوت شكريا ..

سلامة : شكرية مين يا حاجة !!!! إنتى مش قلتى إنك ھارشا .. دھ ايه الخايلة إلی على الصبح دى يا جدعان ..شكرية

دى عندنا إحنا

ھارشا : بھوت شكريا سلامة .. يعنى شوكرن كثيرا بالأربى ..

سلامة : معلى اعذرینى انتى عارفة ان دھ اول يوم لیا فى الغربة .. ولسه ماخذتش على اللغة الھندى ..

ھارشا : سمجيقا .. سمجيقا ..

سلامة : ھى مين اللى سمجيقا ..

ھارشا : أنا سمجيقا ..

سلامة : لا اله الا الله .. مش قلنا ھارشا ومن الھند .. انتى بتشتغلینى ولا ايه يا حاجة .. ايه بقى سمجيقا دى !!!!

ھارشا : سمجيقا يعنى فھمت .. يعنى فھمانة .. فھمانة يا سلامة ..

سلامة : يا سلاام .. طب والله انا افكرت ان دى جنسية تانية ولا حاجة .. المهم يا ست ھارشا يا سمجيقا .. انتى ايه

اللى خلاكى تسيبى الھند وتيجى هنا !!؟

ھارشا : (بأسى وإنكسار ويصاحب كلامها نزول مؤثر موسيقى حزين) جى خاو سلامة .. جى خاو .. جى خاو ..جى

خاو

سلامة : جى خاو !!!!

ھارشا : (بنفس الأداء) أكل الإيش سلامة .. أكل الإيش .. أكل الإيش .. أكل الإيش

سلامة : حتى إنتوا كمان بتتسحطوا زينا عشان أكل العيش .. بس إنتى ست .. إزاي سايبه جوزك وعيالك ..

ھارشا : جوزى لأ .. أنا مش ممكن سيبب جوزى ..

سلامة : والله فيكى الخير يا ھارشا ..

ھارشا : أنا سيبب عيالى بس ..

سلامة : نعم ياختى !!!! يعنى انتى وجوزك هنا وسايبين عيالك فى الھند ؟!!!!

ھارشا : هنا لازم جوزى يكون معايا مرافق .. قانون سلامة .. قانون ..

سلامة : لا .. ولا قوة الا بالله .. يعنى تسيبوا العيال لوحدهم يا ولداه ؟!!!! وعلى كده عندكم كام عيل ؟؟؟

ھارشا : عندى جوھار ..

سلامة : جوھار !!!!

iCulture

هارشا : وجوزى عنده يك ..

سلامة : يعنى إنتى وجوزك جواهر يك ..

هارشا : ها سلامة .. ها ...

سلامة : ده ايه دور الطاولة اللي أنا وقعت فيه ده !! .. وعلى كده بقى بتلعبى معاه محبوسة ولا عادية !!!

هارشا : من زمان مالعبناش سلامة ..

سلامة : طب وبالنسبة للعيال جبتوهم على كام دور ..

هارشا : (ترفع أصابع يدها الخمسة) يانج سلامة .. يانج

سلامة : ويا ترى جوزك كان بيقرص ؟؟

هارشا : بيقرص !!!

سلامة : بيقرص فى الزهر يعنى ..

هارشا : لسه مستنيين الزهر إلعب سلامة .. يارب زهر إلعب .. آه لو لعبت يا زهر (تقولها بالعربى المكسر)

سلامة : كلنا مستنيين الزهر يلعب يا هارشا .. سواء فى مصر اوفى الهند ..

(من الممكن أن تنزل أغنية آه لو لعبت يا زهر مع تغيير بعض الكلمات لتكون ذات لكنة هندية وأيضاً تغيير اللحن والتوزيع لتكون أشبه بالأغنية الهندية)

سلامة : قوليلى بقى عيالكم عايشين هناك لوحدهم إزاي ؟؟؟

هارشا : واحد إشتغل فى مصنع توكتوك .. والثانى إشتغل سواق على التوكتوك .. والثالث إشتغل عفشجى للتوكتوك ..

سلامة : طب والرابع ؟؟؟

هارشا : الرابع هو الزبون اللي إركب التوكتوك ..

سلامة : ده إيه التوكتوك إالى فاتح بيوت الهند كلها ده .. إمال عندنا فى مصر سواقين التوكتوك ببشحتوا ليه ؟!! طب

وبالنسبة لليك بتاع جوزك .. ابن درتك يعنى .. بيعمل إيه ؟؟؟

هارشا : لا ده مش إعرف سوق توكتوك خالص ..

سلامة : أمال بيسوق إيه ؟؟؟!!

هارشا : فيل

سلامة : فيل !!! إزاي !!

هارشا : ها سلامة فيل .. فيل ركاب .. شغال على خط نيودلهى مومباى

سلامة : يعنى الأربعة الجواهر على تكتك والغلبان اليك لوحد على الفيل !! طب ماحدث فيهم فكر مثلاً يفتح عفشجى

فيل .. قطع غيار أفيال .. ظبط زوايا رجلين الفيل .. أى حاجة من دى ؟!!!

هارشا : ناھى .. ناھى سلامة .. الفيل عندنا ناھى إيتعب .. ناھى بيوظ .. ناھى يظبط زوايا ..

سلامة : عندك حق .. مهما كان الفيل فيل برضه ... حافظ مكانته .. ماينفحش نساويه بأى حيوان تانى .. جاموسة ولا معزة ولا حتى بقرة من اللي عندهم جنون اليومين دول ..

هارشا : (تضطرب اضطراب شديد جدا عند سماعها كلمة بقرة) إنت قلت إيه سلامة ؟؟؟!!

سلامة : قلت إيه !! قلت الفيل أحسن من الجاموسة ..

هارشا : وإيه !!!

سلامة : والمعزة ..

هارشا : وإيه !!!

سلامة : البقرة

هارشا : (بانفعال وخوف) ناھى .. ناھى سلامة .. بقرة ناھى .. بقرة ناھى .. (تجلس على الارض وتؤدى بيديها

علامة التقديس وتكرر كلمة هي جاي) هي جاي .. سامحيه .. هي جاي .. هي جاي .. سامحيه بقرة .. سامحيه

سلامة : في إيه يا هارشا .. هي البقرة دي كانت من بقيت عيلتك ..

هارشا : يا ريت سلامة يا ريت .. يا ريت بقرة تبقى أمي .. يا ريت بقرة تبقى أبويا .. (تجلس على الارض وتؤدى

حركة التقديس بيديها) هي جاي .. سامحيه هو مش إعرف .. سامحيه .. هي جاي .. هي جاي ..

سلامة : عايزة أمك تبقى بقرة !!! ده ايه الجنان ده يا ربي !! والله فعلا الهند دي بلد العجائب ..

هارشا : (مازالت تجلس وتؤدى علامة التقديس) احنا عندنا نقدر البقر سلامة .. هي جاي .. سامحيه .. هي جاي ..

هو مش إعرف .. هو مش إعرف .. هي جاي .. هي جاي ..

سلامة : ماترعليش مني يا أخت هارشا .. واضح إن الهند كلها مهروشة لامواخدة .. وأنا اللي كنت مفكر إن إنتي بس

اللي هارشا ..

هارشا : البقرة دي أمنا كلنا .. هي أم كل الناس ممنوع إضربها .. ممنوع إشتها .. ممنوع إركبها ..

سلامة : يابنتي عندنا لو طلنا ناكلها نية هناكلها .. بس إنتي لايميني عليها ..

هارشا : (صدم صدمة شديدة) تاكلوها !!!! ناھى .. ناھى .. ناھى .. هي جاي .. هي جاي (تجلس مؤدية علامة

التقديس)

سلامة : هو البقر عندنا إتجنن من شوية .. أنا مش عاوز أقولك بنعمل إيه تاني ..

هارشا : ناھى سلامة .. هي جاي .. (مازالت تؤدى حركة التقديس)

سلامة : إنت هتتهنهي من دلوقتي .. أمال لو حكيت لك بالتفصيل هتعملي إيه !!! .. بصي يا ستي ... بعد التعذيب

والضرب والشتيمة واللادى منه ... بندبجها ..

هارشا : ناھى ..

سلامة : وبعدين نسلخها

هارشا : ناھى .. ناھى ..

سلامة : ونطبخها

هارشات : ناھى .. ناھى .. ناھى ..

سلامة : المصيبة بقي مش في كده ..

iCulture

هارشا : أمال مصيبة فى إيه سلامة؟؟

سلامة : أقولك بس تمسكى أعصابك

هارشا : ها سلامة .. قول

سلامة : هيه .. اجمدى وماتتخضيش .. واحد اتنين تلاتة .. (يقولها بصوت عالى وبشكل إعلانى) بنعملها بوفتيك ..

هارشا : (تنهار) ناھى .. ناھى .. ناھى بوفتيك .. ناھى بوفتيك .. ناھى بوفتيك .. (تؤدى حركة التقديس)

سلامة : ومش عاوز أقولك بقى على التقلية

هارشا : فى تقيل أتقل من بوفتيك سلامة!!!!!!

سلامة : طبعاً .. إنتى عارفة الفلاحين عندنا بيعملوا إيه ..

هارشا : (مازالت مخضوضة) إيه سلامة .. فلاحين إعملوا إيه فى بقرة !!!

سلامة : (يهمس فى أذنها كأنه يقول سر) أحياناً بيسيبيوا البقرة لوحدها مع الجاموسة ..

هارشا : طب وفيها إيه سلامة .. فىن مشكلة !!!

سلامة : لأ .. ماھى مش جاموسة .. أنا قصدى يعنى .. ذكر جاموس .. عندنا بيقلولوا عليه ... فحل جاموس ..

هارشا : (باستغراب وحسرة) يسيبيوا بقرة مع فحل جاموس لوحدهم .. هى جاى .. هى جاى ..

سلامة : ولكى أن تتخلى بقى البقرة بتاعتك ممكن يحصل فيها إيه ...

هارشا : ناھى .. ناھى .. ناھى جاى .. هى جاى .. كفاية أرجوك سلامة كفاية .. مش عدت أقدر أتحمّل .. هى

جاى .. هى جاى ..

سلامة : معلش يا هارشا سامحينى .. بس كان لازم أصارك بالحقيقة .. آه عشان تتصرفوا وتلموا البقر بتاعكم بدل

ماهو سارح فى بلاد الخلق كده .. وجاموس معاه لوحدهم وحاجات مش ولا بد ... آه كده شكلكوا وحش قوى ..

هارشا : فعلاً لازم نتصرف .. سامحينى بقرة .. هى جاى .. احنا غل نا فى حق م ..

سلامة : إلا ماقلتليش صحيح .. هو الاستاذ جوزك المرافق بتاعك فىن؟؟

هارشا : جوزى مش شفته من سنتين ..

سلامة : نعم !!! إزاي ده !!! مش هو هنا معاكى والمفروض إنه مرافق ليكى !!!

هارشا : ها .. بس ده على الورق سلامة .. لكن أول لما وصلنا المطار هو راح مدينة بعيدة إشتغل فى مزرعة وأنا

إشتغل هنا مع شيخ عليان ..

سلامة : يا ولاد اللعيبية .. ده إنتوا غلبتوا على المصريين .. ومزرعة إيه اللى بيشتغل فيها جوزك؟؟

هارشا : مزرعة بقر

سلامة : بقر !!! وبيتحمل يشوف البقر وهو محبوس (بتريفة وسخرية) حرام عليكم يا ظلمة .. هى جاى .. هى جاى

.. هى جاى ..

هارشا : ناھى .. ناھى .. هو إعمل حاجة مهمة جدا ..

سلامة : إيه !! بياكلهم !!!

iCulture

هارشا : ناهى

سلامة : بيشر بهم !!!

هارشا : ناهى .. هو إغسل لهم بعد ما يعملوا (إي إيج)

سلامة : نعم ياختى .. يغسل لهم بعد ما يعملوا إي إيج

هارشا : وكمان حط ليهم برفانات وكريمات عشان تسلخات ..

سلامة : يا حلاوة .. البقرة بيتحط لها كريمات عشان التسلخات .. ده احنا حدانا فى البلد لو واحد جاله تسلخات ببقى

طاير من الفرخ .. لدرجة إنه بيصور رجليه وبيعملها حالة وينزلها على الفيس .. عوض عوضين أبو عويضة

يشعر بالتسلخات

هارشا : وكمان بيقوم بأقدس مهمة عندنا ..

سلامة : أقدس مهمة !!!؟؟ مهمة إيه دى ؟؟؟

هارشا : بيجمع البيبي بتاعت البقرة ..

سلامة : وهى دى مهمة مقدسة .. ما إحنا حدانا فى البلد بنجمعها وبنولع بيها الفرن البلدى

هارشا : ناهى .. ناهى .. احنا نجمعها عشان نستبارك بيها .. دى بركة لينا كلنا ..

سلامة : يا نهار مش فايت .. إنتوا بتجمعوا البيبي بتاعت البقر عشان تستباركوا بيها !!!

هارشا : ها .. ها سلامة .. دى فيها بركات كتير قوى قوى .. تحب أجيب لك شوية تستبارك بيهم ؟؟

سلامة : لا ياختى .. بهوت شكرية .. بهوت شكرية على الآخر .. الله الغنى ... خللوها لكم إستباركوا إنتوا بيها براحتكم

هارشا : طب بص سلامة .. هسبقكم على جامع تانى ولما ييجى شيخ عليان بلغه إن هارشا سبقتمك عشان تحضر ليكم

الشغل .. هى جاي .. هى جاي .. هى جاي (تؤدى حركة التقديس وتشير إلى سلامة) سامحيه بقرة هو مش

إعرف .. (ثم تنظر إليه فجأة وتقول) سلامة ... كى ألفيدا ناكينها ..

سلامة : طب ليه كده بقى .. ما كنا كويسين ..

هارشا : كى ألفيدا ناكينها ..

سلامة : عيب كده يا ست هارشا .. إحنا حلوين مع بعض من الصبح بلاش شتيمة لو سمحتى

هارشا : كى ألفيدا ناكينها .. يعنى .. لا تقول وداعاً بل إلى اللقاء

سلامة : آآه .. والله فهمتها شتيمة .. خلاص يا ستى كى ألفيدا ناكينها كلنا

هارشا : باى باى .. باى باى سلامة

سلامة : مع السلامة يا ستى هارشا .. (بتريفة) هى جاي .. هى جاي .. هى جاي

(تخرج هارشا ويدخل عليان)

سلامة : إيه يا شيخ عليان إتأخرت ليه .. هارشا لسه ماشية حالا ..

عليان : مش قلتك ما تقلق يا راجل طول ما إنت معى إعتبر نفسك بالدوام ..

سلامة : نفسى بقى أدخل المعمل وأعمل الاختبارات بنفسى .. وأطبق العلم اللى فى دماغى وأطوره كمان .. بصراحة

أنا حاسس انى هبقى حاجة كبيرة قوى و نقطة انطلاقى هتبقى من هنا ..

عليان : مافى شك أبدأ فى هذا الكلام فعلا نقطة انطلاقك هتبقى من هون ... إيش رأيك فى هذا المسجد؟؟

سلامة : يا سلام عليك يا شيخ عليان ... والله انت تقى وورع .. الصلاة عندك أهم من الشغل .. احنا ياما هنتعلم منك

عليان : الصلاة قدامها متسع يا راجل .. ماضرورى نصلى الحين .. بعد الدوام نصلى براحتنا

سلامة : يا سلام عليك يا شيخ عليان ...والله انت انسان عملى فعلا ووقتك منظم وكل دقيقة بحساب .. نخلص الدوام

وبعدين نصلى .. الصلاة قدامها متسع .. احنا ياما هنتعلم منك ..امال لامواخذة يعنى احنا هنقعد هنا ليه

عليان : والله يا سلامة حاسس ان أصابع يدي خدلانة .. زهقانة ..تعبانة ..شو بيها ما بدرى !!شوف ..(يمد يده إلى

سلامة ويمسك سلامة أصابعه)

سلامة : فعلاً شكلها مش طبيعى .. انت زعلتها فى حاجة .. أو اضايقت منك فى شئ؟؟؟

عليان : والله يا سلامة مو فاكتر .. بس حاسس إن صار عندها اكتئاب أو هاد شئ .. الطبيب قالى لازم كل يوم تدلكها

شوية لغاية لما تطلق

سلامة : فعلا يا شيخ عليان كلام الدكتور صح هى ممكن تكون زهقانة حبتين أو فى موضوع شاغلها ولا حاجة هو

اللى جاب لها الإكتئاب ده .. التدليك والطققة أكيد هيرحوها

عليان : طب يالا يا سلامة .. ورينا شطارتك

سلامة : شطارة إيه !!!!!

عليان : دلکها وخليها تطلق ... بس بالله عليك خليك حنين ...

سلامة : أدلك إيه يا عم انت مفكرنى ايه ..أنا جيولوجى مش بتاع تدليك وطققة .. يعنى بأشتغل فنى معامل خرسانة

ومواد مش فنى تدليك و طققة صوابع !!!!

عليان : يعنى يهون عليك صوابعي المرضانة .. مو انت قلت بنفسك شكلها مو طبيعى ...

سلامة : يا سيدى ألف سلامة عليها ربنا يشفيهاك ويفك الاكتئاب اللى عندها .. بس أنا مش هأدلکها ..

عليان : بص يا سلامة .. مافى شغل لك الا لما صوابعي ترتاح

سلامة : يعنى ايه مش فاهم !!!!

عليان : لا .. انت فاهم ...مافى تدليك .. ما ي غل .. مافى راتب

سلامة : لا .. حاسب عندك أنا ما باتهددش .. ولا يهمنى الكلام ده كله .. انت مفكر انك هتشترينى بفلوسك

عليان : خلاص ذنبك على جنبك .. نشوف بقى جيولوجى تانى يداوم بالمعمل ويكون بيعرف يدلك الأصابع

سلامة : أنا لو فرضاً وعملت كده يبقى عشان انت راجل كبير ومريض وصعبت على بس .. أنا ما أعملش حاجة لوى

دراع أبدأ .. كل اللى أعمله بمزاجى ..

عليان : مفهوم .. مفهوم .. طبعاً بمزاجك (ويمد إليه يده ويبدأ سلامة فى تدليك أصابعه)

سلامة : (ما زال يدلك أصابع الشيخ عليان) بس أنا عاوز أفهم ليه ما فضلتش فى العربية وعملنا الحكاية دى واحنا

فيها ... لازمة القعدة هنا إيه !!!

عليان : راح تفهم لما المصلين يخرجوا

سلامة : ماشى ... ايه الأخبار .. ما اتحسنتش شوية؟؟

عليان : اتحسننت كتير .. والله الواحد يشتغل الحين وهو مرتاح

سلامة : تشتغل!!!! تشتغل ايه يا شيخ عليان أمال احنا هنا بنعمل ايه !!

عليان : الشغل اللي بأعمله ما فى حدا يقوم بيه غيرى

سلامة : يعنى ايه مش فاهم

عليان : بعدين أفهمك .. الأول جيب لى عصابة العين اللي بالسيارة

سلامة : حاضر يا سيدى (يخرج سلامة)

عليان : (يحدث نفسه) والحين نستعد للشغل

(ثم يخلع جلبابه المهندم النظيف الغالى لنجده يلبس تحته جلباب آخر رث ومهترئ وبه ترقيعات توضح الباعة والفقير

على من يرتديه)

(يدخل سلامة ومعه عصابة العين)

سلامة : ايه ده يا شيخ عليان !! ايه اللي انت لابسه ده !!!

عليان : الآن تعرف ... بس هات العصابة

(يأخذ العصابة من سلامة ويلبسها ليغضى عين واحدة فيظهر وكأن له عين مفقوعة ثم يجلس فى مكان بجوار باب

المسجد فى وضع رجل مسكين ويمد يده للمصلين الذين بدأوا فى الخروج طالبا منهم صدقة)

عليان : الصدقة أثابكم الله ... الحسنات يذهبن السيئات .. أحسنوا إلى فقراءكم جزاكم الله ...

(ويضع المصلين النقود فى يده الممدودة)

سلامة : يا نهار مش فايت!!!!!! انت بتعمل ايه يا شيخ عليان .. يا راجل ده انت صاحب مؤسسة .. ازاي تعمل كده

!!!!!!

عليان : يا سلامة ما تنزعج .. هاد هي المؤسسة

سلامة : هاد ايه!!!!!! هي فين دى!!!!

عليان : مؤسسة الحسنات يذهبن السيئات .. مش مع هيك المؤسسة تعاقدت؟؟؟

سلامة : طب والمعامل والأبحاث اللي هأعملها ومستقبلى؟؟؟؟؟

عليان : يا راجل ما تستعجل .. كل شئ هيجى ... مو قلنا ان نقطة انطلاقك هتبقى من هون

سلامة : يعنى ايه؟؟؟؟؟

عليان : يعنى ربك كريم .. لما نتعب هون ونجتهد الله يكافئنا بأموال نسوى بيها المعامل وكل شئ .. بس الأول نركز

هون (يخاطب المصلين الخارجين من المسجد) الله ما يكتب عليكم المذلة .. الله يعطيكموا..

سلامة : يا عالم يا هووه .. حد ينقذنى ... بقى أنا سايب بلدى ومتغرب عشان أشتغل شحات هنا ... مش ممكن ده

مستحيل .. يفتح الله يا عم أنا راجع

عليان : هدى نفسك يا سلامة .. أولا انت مو شحات .. انت شغلتك هتسوق ليا وتوديني المساجد وترجعني البيت
وبالمرّة تدلك أصابعي المريضة .. صدقتي يا سلامة مو هتشتحت أبداً طول ما أنا موجود
سلامة : لا يا عم أنا مش موافق .. ده أنا أموت من الجوع فى مصر ولا كده ... أنا هأرجع بلدى
عليان : والله مجيك هون بمزاجك وحريرتك .. أما انك تمشى فدا بمزاجى أنا وحريرتى
سلامة : يعنى هتمنعنى ولا ايه ؟؟؟؟
عليان : أنا ما بمنع حدا ... بس هما بالمطار هيمنعوك عشان مافى معك جواز سفر
سلامة : يعنى مش هاتدينى جوازي .. بتمسكنى من ايدى اللى بتوجعنى
عليان : أبداً يا سلامة والله أنا حبيتك .. وبعدين يا راجل ايدى أنا اللى بتوجعنى مو ايدك .. أقولك على شغلة .. أول لما
أصابعى ترتاح من هاد الإكتئاب ومابدها تدليك ولا طقطقة أنى راح أعطيك جوازك وتمشى . اتفقنا؟
سلامة : يعنى مصيرى مرتبط بنفسية صوابع سيادتك .. يا حلوة
عليان : (يعد النقود) والله وشك حلو على يا سلامة شوف الحصىلة قد ايش (يعطيه نقود) امسك دول حلال عليك
سلامة : بس يا شيخ عليان أنا قلبى مش مبسوط
عليان : بص .. حظهم هون بجوار قلبك (ويضعهم فى جيبه العلوى الملاصق لقلبه) يمكن لما يكونوا جنبه يتبسط
سلامة : طب وأقولهم ايه فى البلد .. بأشتغل سواق لواحد شحات ... وكمان بأدلكله صوابعه !!!!!
عليان : وهما يعنى فى البلد هيرسلوا مراقبين عليك .. قولهم انك خبير وعالم وباحث جيولوجى .. مش هيك مكتوب
با عقد ؟؟
سلامة : أيوه يا أخويا هيك مكتوب بالعقد
عليان : وبعدين هما فى البلد بيسألوا فى الأول عن عملك لكن أول ما ترسل لهم المسارى ينسوا انت بتشتغل ايش أو
جبتها كيف .. ما بيفتكروا الا ميعاد تحويل المسارى لهم وبس
سلامة : على النعمة انت طلعت راجل أوبح .. فعلا احنا ياما هنتعلم منك
عليان : بأقولك يا سلامة ...
سلامة : قول يا خويا قول ...
عليان : (يجلس ويمسك أصابع قدمه) حاسس زى ما يكون أصابع رجلى مو بحالتها زى كل يوم
سلامة : مو بحالتها ازاي يعنى .. ياعم ده لو يتامى متبنيهم من ملجأ ماكنتش هتعالملهم زى ما بتعامل صوابعك كده ...
دى فى الأول وفى الآخر صوابع .. على النعمة احنا عندنا فى مصر لو ليهم تمن كنا بغاهم من زمان .. يا باشا
احنا نص الشعب دلوقت عارض كليته للبيع ... وانت بتكلمنى عن صوابع رجلك !!!!!
عليان : مش بيقولوا راحة الانسان تبدأ من القدمين .. وأنا بدى أرتاح
سلامة : ما تريحهم يا سيدى حد حايشك
عليان : والله حاسس ان الاكتئاب اللى فوق اتنقل تحت
سلامة : يعنى ايه !!!!

عليان : (ينام ويرفع رجليه فى وجه سلامة) يعنى لازم يقطعوا يا سلامة...



iCulture

20

Empowering creative minds

اللوحه الرابعه

(منزل بسیونى وقد طرأ عليه تغيير كبير من ناحية الحداثة والتطور وبدت مظاهر الغنى عليه وعلى البيت)
(يرتدى بسیونى جلباب أبيض اللون وشال وقد أطلق لحيه خفيفة ويظهر معه علام والشيخ حامد وفهيم ومرزوق)

علام : والله أنا سفرت كثير وقليل ... وشباب كثير اغتنوا على ايدى .. انما زى الدكتور سلامة أنا ماشفتش .. ده مش غير من حاله بس ... ده غير من حالنا كلنا .. خلى بلدنا لها قيمة بين البلاد ... ايشى جامع كبير ومحلات عطور وبخور .. لأ وايه كل ده فى سنة واحدة ... ربنا يكرمه ونشوفه هنا قريب ان شاء الله

بسیونى : يا راجل تف من بقك .. ينزل يعمل ايه .. بلاش تكاليف على الفاضى

علام : أنا قصدى ربنا يمد فى عمرنا ونشوفه على خير يا حاج بسیونى

بسیونى : يا أخويا ماهو طول النهار معاك على النت ... انت عارف نزلته دى تتكلف كام !!؟

علام : عارف يا حاج بسیونى .. عندك حق .. ربنا ما يرجعه ولا يجعلنا نشوفه عن قريب قادر يا كريم

بسیونى : يسمع من بقك ربنا

علام : انت عارف ان كثير من اهل البلد كلمونى عشان الدكتور سلامة يترشح للعمودية

بسیونى : وهو يعنى حد يستحقها غيره

علام : لأ طبعا .. غنى وبقى أغنى واحد فى البلد .. منصب ومفیش حد وصله قبل كده .. ناقصه ايه تانى !!!

بسیونى : قر بقى يا خويا

علام : أنا هاقر على أخويا الصغير يا حاج بسیونى .. ده كلام برضه .. أهه فتح اهه (ينظر إلى الموبيل) تعاد جنبى

كده يا شيخ حامد عشان نستفهم منه عن كل حاجة بالظبط .. وانت برضه يا واد يا مرزوق تعالى جنبى هنا

فهيم : إلا صحيح يا بسیونى يا أعرج زى ما سمعنا كده ان سلامة ابنك بقى حاجة كبيرة قوى فى بلاد بره ???

بسیونى : ببشرف على خمس مؤسسات لوحده .. وكل مؤسسة فى محافظة شكل .. وكل واحدة فيهم بتاعت شيخ كبير

قوى وكلهم بيتخانقوا عليه ... بيروح مع كل شيخ أسبوع واحد بس فى الشهر .. بيقولى يا أبا ماعدوش

يقدرنا يستغنوا عنى أبداً

فهيم : يا سلام !!!!

بسیونى : بيقولى ان ايديه لو طالوا يلفوها فى حرير هيلفوها

فهيم : يا سلام !!!!

بسیونى : أمال ايه ... هو انت مفكر الشغل اللى بيعمله سلامة بايده حد يعرف يعمله ...

فهيم : يا سلام !!!

بسیونى : ده ايده دى مرهم .. بيقولى يا أبا العينة ما بتخدش غلوة فى ايدى .. بالكثير ربع ساعة تكون لانت معايا

ورحرت ..

فهيم : هى ايه دى اللى رحرت ؟؟؟؟

بسيونى : العينة يا فهيم

فهم : العينة !!!! طب وبعدين ???

بسيونى : وبعدين يبدأ يحلل فيها إيشى من فوق وإيشى من تحت ... لما تطلق فى ايده... يبقى كده خلاص العينة
نجحت

فهم : (باستنكار) هى ايه دى اللى تطلق يا بسيونى يا أعرج ؟؟؟؟

بسيونى : العينة يا فهيم ... عندك اعتراض ... انت هتفهم أكثر من الدكتور سلامة .. ماتروح تشتغل مكانه أحسن

فهم : لأ بس أنى بحب أفهم كل حاجة

بسيونى : وفهمت يا فهيم ؟؟؟؟

فهم : طبعاً وانت شايفنى غبى ولا ايه يا بسيونى يا أعرج ...

بسيونى : طيب .. واللى عاوزك تفهمه كمان إن أنى خلاص ماعدتش بسيونى الأعرج

فهم : أمال بقيت إيه يا بسيونى يا أعرج !!!!!

بسيونى : بقيت الحاج بسيونى أبو رجل سليمة ...

فهم : بأمره إيه يا بسيونى .. ما انت بتعرج أهه !!

بسيونى : وأنى بأقولك مش أعرج .. عندك اعتراض ???

فهم : إيوه عندى يا بسيونى يا أعرج .. هو أنى يعنى هأكدب عينيه !!!

بسيونى : طب الاعتراض خليه عندك يمكن ينفك .. إنما بقى الخمس تلاف جنيهه اللى استلفتهم منى شكلى كده

هأعوزهم انهارده

فهم : إنهارده !!! احنا مش اتفقنا بعد سنة يا بسيونى ???

بسيونى : حد يستلف فلوس من واحد أعرج ويصدقه يا فهيم ...

فهم : أعرج !!!!! هو فين الأعرج ده يا حاج بسيونى !!!

بسيونى : كنت سامعك يعنى بتقول كلمة أعرج ..

فهم : يا راجل انت فهمت ايه .. ده أنى كنت بأتكلم عن نفسى .. أنى اللى أعرج يا حاج بسيونى .. تصدق بقى إن

رجلى جالها عرج مفاجئ ..

بسيونى : يا سلام

فهم : والله زى ما بأقولك كده يا حاج بسيونى يا أبو رجل سليمة ... حتى شوف (يمشى وهو يعرج)

بسيونى : خلاص يا راجل يا طيب .. براحتك على الفلوس ولو عاوز حاجة تانية عشان العرج اللى فى رجلك ده ابقى

قولى يا فهيم يا أعرج ...

فهم : ربنا يخليك يا حاج بسيونى يا أبو رجل سليمة ويبارك لنا فيك وفى رجلك (يخرج فهيم وهو يمشى مشية

الأعرج)

علام : يا خسارة

iCulture

الشيخ حامد : إيه يا أستاذ علام

علام : قفل

حامد : ليه كده ده احنا مالحنناش نكلمه ...

علام : بيقول إن عنده شغل دلوقت .. وبيقول ادعولى العينة تططق بسرعة .. أصلها باين عليها صعبة ومحجرة ..

حامد : العلم نور برضه .. هناك بيطلقوا العينات واحنا هنا آخرنا نطقق الملح الخشن .. ربنا يسهلهاك يا دكتور

سلامة

علام : وبيقولك يا حاج بسيونى إنه زعلان عشان ما حضرش ميتم أمه .. بس الشغل كان زانقه ومعرفش ينزل

بسيونى : أحسن إنه ماجاش .. وفر اللي كان هيصرفه ..

علام : وكمان بيقولك إن هارشا الهندية نازلة مصر اليومين دول .. وأول لما توصل هتجيلنا هنا فى ميت أبو العدل ..

بسيونى : جاية ضيافة لا قدر الله ... ولا شغل؟؟

علام : لأ إظمن يا حاج بسيونى .. شغل .. جاية مأمورية وراجعة عطول ..

بسيونى : مأمورية؟؟ مأمورية إيه يا علام؟؟

علام : مش عارف .. بس بيقولك إن معاها هدية مخصوص ليك وبيقولك يا أبا لازم تقبل الهدية ..

بسيونى : (يحدث نفسه) هدية !!! يا ترى هدية إيه اللي جايها معاها هارشا دي !!!!؟؟ (يحدث علام) و سألته

عن الجامع اللي اتبنى هنسميه ايه ...

علام : ودى عايزة كلام برضه يا حاج ... من غير ما أسأله .. الجامع هيتسمى جامع الحاج بسيونى

بسيونى : الحاج بسيونى أبو رجل سليمة

علام : أبو رجل سليمة طبعاً .. آه وبيقولك يا شيخ حامد قدم استقالتك من الأوقاف ومن انهارده انت امام الجامع ده ..

وهيبت لك مرتبك قد اللي بتاخده 3 مرات ..

حامد : ربنا يبارك لك يا دكتور سلامة ويزيدك من خيره .. بس كان فى مسألة كده كنت عايزه بيعت لى الفتوى فيها

ضرورى...

علام : مسألة ايه يا شيخ حامد ???

حامد : الأسبوع اللي فات لما قالنا ما حدش عاد يشتري حاجة من جرجس البقال عشان حرام .. أنى نبهت على البلد

كلها وما حدش اشترى من يومها

علام : طب ايه المشكلة بقى

حامد : كان فيه ناس شارية منه حاجات من زمان ومخزناها .. الحاجات دي حرام يرموها ولا حلال يستخدموها؟؟

بسيونى : يرموها طبعاً يا شيخ حامد .. ودى يعنى عايزة مفهومية ...

حامد : هو قالك يا حاج بسيونى ???

بسيونى : من غير ما يقول ... هو مش أنى أبوه .. واللى أقوله فى غيابه يمشى ... ولا ايه يا حامد؟؟

حامد : مظبوط يا حاج ربنا يبارك لنا فى العيلة كلها ..

علام : وانت يا واد يا مرزوق الدكتور سلامة بينبه عليك من انهارده تتقسم انت وأخوك .. انت فى حته وهو فى حته ..
ازاى تقعد انت وهو ومراتكم فى بيت واحد .. انت مش عارف ان حرام تشوف مراته وتكلمها ولا هو يشوف
مراتك و يكلمها ...

مرزوق : بس احنا طول عمرنا كده يا أستاذ علام من أيام أبهاتنا وأجدادنا ..

حامد : وعرفنا الصبح يا مرزوق يبقى عمله ولا مانعلوش ???

مرزوق : ده لو أنى قلت كده لأخويا هيطب ساكت .. ده هو اللى مرببى .. احنا عمرنا ما اتفصلنا عن بعض .. فى الغيط
سوا وفى الدار سوا ..

حامد : يعنى عاجباك العيشة الحرام اللى انت عايشها انت وأخوك يا مرزوق ??? نفذ اللى سمعته وإلا قسماً عظماً
لنيجى نطردكم من البلد إنت وأخوك .. هى ناقصة فسق ..

مرزوق : يا خرابى هى وصلت للفسق !!!

حامد : أمال إنت فاهم ايه ياخويا .. انت ماتعرفش انك كده بتحارب شرع ربنا ...

مرزوق : أحارب شرع ربنا .. يا نهار مدوحس !!!

بسيونى : تقدر تقولى أخوك فىن دلوقتى ???

مرزوق : فى الدار

بسيونى : ومراتك ???

مرزوق : فى الدار هتكون فىن يعنى ..

حامد : يا حلوة .. يعنى هما الاتنين مع بعض تحت سقف واحد وحضرتك قاعد لى هنا !!!

مرزوق : طب وفيها ايه يا شيخ حامد ده أخويا الكبير

حامد : هو الدين فيه أخويا الكبير وأخويا الصغير !!! ما ينفعش تقعدوا انتو الاتنين فى دار واحدة .. الدكتور سلامة

حسم الموضوع خلاص

مرزوق : ماهى الدار صغيرة وما ينفعش نقسمها .. وانت عارف الحالة عاملة ازاى ..

بسيونى : يبقى واحد فيكوا بس هو اللى يقعد والتانى يشوف له حته تانية تتاويه

حامد : وبكده يبقى طبقنا شرع ربنا

مرزوق : حاضر يا شيخ حامد .. اللى تشوفوه (يخرج مرزوق)

حامد : عن اذنكم هأروح أفتح الجامع عشان صلاة العصر (يخرج حامد)

(تدخل راوية)

علام : أهلا بست العرايس

راوية :مش باين لها عرايس ولا عرسان يا أستاذ علام

بسيونى : ليه يا راوية بتقولى كده بعد الشر

راوية : بصراحة اتخنقت من ابك .. كل ما أكلمه وأفاته فى موضوع النزول ألقيه بغير الموضوع ويتهرب منى

وبقالو أسبوع ما بيردش على

بسيونى : نزول !!! نزول ايه كفانا الشر .. ده يادوب كمل السنة وبعدين ينزل يعمل ايه !!!!

راوية : نتجوز يا أبو سلامة ... أنا مشرطة عليه من قبل ما يسافر هي سنة ونتجوز

علام : بس انتى عارفة إن أقل مدة الواحد يقعدا بره عشان الغربية تجيب همها مش أقل من سنتين أو ثلاثه

راوية : هو النزول هيكلفه كام يعنى .. ما هو الحمد لله ربنا فاتحها عليه

بسيونى : انتى مش فاهمة حاجة .. سلامة لو سابهم ونزل دلوقت ممكن يستغنوا عنه ويخسر شغلته

راوية : وأنا مش هفضل متعلقة كمان سنتين تلاتة .. كفاية 3 سنين خطوبة لغاية دلوقت

علام : خلاص يا جماعة أنا عندي الحل

بسيونى : قول يا أخويا

علام : انت اللي هتحلها يا حاج بسيونى

بسيونى : ايه هأتجوزها أنا !!!!!

راوية : أيوه بس انتوا كده فاجنتونى يا جماعة

علام : فاجنناكى ايه ياختى ... إنتى صدقتى انه هيتجوزك ولا ايه ... انتى المهم عندك تتجوزى وخلص

راوية : امال هيحلها ازاي يعنى ???

علام : سلامة عامل توكيل لأبوه .. يعنى ممكن نكتب الكتاب من بكرة

راوية : طب والجواز ???

علام : ماتقلقيش اصبرى على رزقك .. هتجوزى .. أساساً سلامة كلمنى فى الموضوع ده وقالى على فكرة كويسة ..

اطمنى يا راوية إن شاء الله فرحكم الأسبوع ده

راوية : يعنى سلامة نازل الأسبوع ده ????

علام : نازل فين بس ... لأ طبعا

راوية : أمال فرحى الأسبوع ده ازاي ... أنا مش فاهمة حاجة إنتوا هتجننوني

علام : ولا جنان ولا حاجة والله الفكرة اللي قالها سلامة عين العقل

بسيونى : قال ايه يا علام

علام : بعد ما نكتب الكتاب العروسة تلبس فستانها وتتزوق وتتزف لغاية بيت جوزها

راوية : وأنا هأتزف هنا وهو قاعد لى هناك فى آخر بلاد المسلمين

علام : لأ هو مش هيبقى قاعد ولا حاجة ... هو برضه هيعملوا له فرح هناك وهيزفوه ...

راوية : الله الله .. يعنى هو يتزف هناك لوحده وأنا أتزف هنا لوحدى .. زغرتى ياللى ماتتيش غرمانه ... انت مش

ملاحظ انها بهوات منك قوى يا أستاذ علام .. طب والله يا شيخ أنا كنت بأحترمك على أساس إنك راجل كبير

وعاقل

بسيونى : طب والنقطة يا فالج هيلمها ازاي ???

راوية : يا عالم يا هووه .. أنا يظهر وقعت بين اتنين مجانيين .. يعنى كل اللي همك النقطة !! مش همك العروسة تبقى
هنا والعريس مسافر...وتجوزوهم لبعض !!!
علام : دلوقت انت حل كل المشاكل دى ... طالما فى نت يبقى كل حاجة ممكنة .. ماتشيليش هم الموضوع ده خالص
بسيونى : يا سلام يا ولاد...ده على كده الواحد ممكن يتجوز واحدة عمره ما قابلها!!!
علام : يا حاج بسيونى كل شى فى النت ممكن
بسيونى : (يحدث علام بصوت منخفض) بقولك ايه ..ما تنساش تبقى توصلى وصلة نت قبل ماتمشى
علام : من عينيه يا حاج بسيونى يا عفريت
راوية : أنا مستحيل أتجوز بالطريقة دى ... هو أنا بايرة ولا بايرة ...
علام : يا عبيطة بايرة ايه .. أجمل بنات وبيتجوزوا كده .. وبعدين هى دى الطريقة الوحيدة اللي هتعرفى تنزلى بيها
سلامة
راوية : ازاي بقى !!!
علام : يعنى طول ماهو عازب مش هيفكر ينزل دلوقت .. لكن لما يتجوزك ويدخل عليكى مش هيعدى خمس أو ست
شهور بالكثير وهتلاقيه نازل على مشامه
راوية : هيدخل على ازاي بس مش فاهمة !!!
علام : هو مش هيكذب كتابه عليكى .. يبقى خلاص هو موجود وانتى موجودة والنت بينكم .. واتصرفوا بقى
راوية : بأقولك ايه .. انا هوافق بس عشان ينزل بعد ست شهور لكن قسماً بالله العظيم لو ما نزل لهيكون لى تصرف
تانى

iCulture

اللوحة الخامسة

(يقسم المسرح الى نصفين و يظهر فى النصف الأيمن سلامة ويرتدى بدلة الفرحة ومعه عليان متواجدان فى شقة سلامة التى يقطنها فى الخارج ، أما النصف الأيسر فتظهر فيه راوية ترتدى فستان الفرحة وبسيونى وعلام وصابر وهم يدخلون منزل سلامة على صوت موسيقى زفة العروسة)

عليان : مبارك يا سلامة ...شدد حيلك . الليلة هى أهم ليلة فى الجواز.... كل شئ بيتوقف عليها بعد هيك

سلامة : ادعيلى يا شيخ عليان .. أصلى حاسس انى متوتر قوى

عليان : الله يقويك .. خد هذه الحبة وقت ما تتزنى خدها

سلامة : ودى كويسة يعنى ؟؟

عليان : دى مجربة يا راجل .. أنا معى أربع نسوان بأقسم الحبة على أربع إربع وبأخلى كل واحدة تكتب اسمها بنفسها على الربع حقها حتى لما يحين دورها ما تتظلمأهم شئ ان الواحد يعدل بينهم يا مزيون ..

سلامة : يعنى ما بتفتكرش العدل غير فى الحاجات دى يا خويا ..و المفروض آخذ كام ربع من دى فى أول ليلة

عليان : والله هاد يتوقف على سرعة النت اذا أكبر من 2 ميغا بيجوز تاخذ 3 ارباع .. شوف يا سلامة اذا بدك اظل وياك حتى اذا ما هنج الجهاز او باظ انى مستعد

سلامة : لأ يا سيدى متشكرين .. عنك انت انا هاقوم باللازم لوحدى

عليان : انت حر ... سلام يا سلامة

سلامة : مع السلامة يا شيخ عليان .. نجاملك فى الخامسة ان شاء الله

(يحدث اظلام فى النصف الأيمن وينتقل المشهد إلى النصف الأيسر من المسرح)

راوية : والله ما انا مصدقة اللى بيحصلى ده !!!!

علام : ايه بس يا راوية مالك !!!!

راوية : بقى انا اتجوز بالطريقة دى .. دى عمرها ما حصلت لحد يا ناس يبقى يوم ما تحصل تحصلى انا !!!

بسيونى : هو ايه اللى حصلك ياختى .. اتعملك ليلة إتكلت شئ وشويات ما اتعملتش لواحدة قبلك فى البلد ... وهدخلى على فرش لو بعنى دار ابوكى مش هتعرفى تجيبى تكلفته ...

راوية : وانت همك على الزفة والفرش وبس .. طب فىن عريسى !!

علام : انتى قلقانة كده ليه .. كلها خمس دقائق يا ستى وهتبقوا لوحدكم أون لايين ..

صابر : (أنا أريسك يا أوية ... أنا اجوزك) (أنا عريسك يا راوية .. أنا أتجوزك)

راوية : ياك عرسة لما تعضك ... عريس ايه يا اهبل انت ..

علام : يا صابر كده عيب .. خلاص راوية اتجوزت وبقت على ذمة راجل تانى

صابر : (هوا فىن آجل التانى) (هو فىن الراجل التانى)

علام : ايه !!! هو فىن !!! ما هو قدامك أهه يا بنىبص هنا وانت تشوفه (يشير الى اللاب توب)

صابر : (ينظر الى اللاب توب فيرى سلامة فيأخذ اللاب توب ويجرى ناحية الشباك ليرميه) (أنا ارميه من شبك)

أنا هرميه من الشباك)

(يجرى الجميع وراءه ليلحقوا به حتى لا يرمى اللاب توب)

علام : ترمى ايه الله يخرب بيتك ... هات يا صابر

صابر : لأ ...

بسيونى : هات يا صابر .. سلامة ده أخوك يرضيك اللي بتعمله فيه ده .. يعنى تبوظ له ليلة فرحه .. ده كلام برضه ..

صابر : (الأمه سافر .. دى صوره .. أنا حب آوية .. انا اجوز آوية) (سلامة سافر .. دى صورة .. أنا بحب راوية ..

أنا هأتجوز راوية)

علام : يعنى يهون عليك ترمى سلامة من الشباك يا صابر ؟ ؟

صابر : (دى مش ألامه .. دى صوره) (ده مش سلامة .. دى صورة)

بسيونى : وبعدين ... هنفضل ساكتين كده للواد الاهل ده ...

راوية : صابر .. تعالى يا صابر ..

صابر : (يفتح فمه سعيداً ويضحك) آوية ...

راوية : هات اللي فى ايدك يا صابر

صابر : (لأ آوية .. أبر حبك .. أبر جنبك .. أبر جوزك .. ألامه صورة .. ألامه سافر) (لأ يا راوية صابر بيحبك ..

صابر جنبك .. صابر جوزك ... سلامة صورة .. سلامة سافر) (ويعطيها قبله على الهواء)

علام : طب اسمعنى يا صابر .. ايه رأيك تبوس راوية وتديها اللي فى ايدك ..

صابر : (يضحك سعيداً) آه ... بوس آوية

راوية : انت بتقول ايه يا استاذ علام .. هو ينفع اللي بتقوله ده !!!

علام : يا راوية ما تكبريش الموضوع .. عيل عبيط وإتربست فى دماغه .. هى البوسة يعنى هتعمل فيكى ايه .. كده ولا

يكسر اللاب توب وتبوظ الليلة !!؟

بسيونى : لأ .. يكسره لأ .. هى ناقصة خساير .. على الأقل لو باسك مش هيكسر فيكى حاجة .. تعالى يا صابر ..

بوس .. بس اوعى الكمبيوتر يقع من ايدك ..

(يقترب صابر ويقبل راوية من خدها ويعطيها اللاب توب)

بسيونى : امشى بره يا أهبل يا ابن الأهبل (ويحتضن اللاب توب)

صابر : آوية .. حبك يا آوية ... ويقبلها على الهواء (بنسونى .. انت أعلج يا بنسونى ... يا بنسونى يا أعلج ...يا

بنسونى يا أعلج) (بسيونى .. انت أعرج يا بسيونى .. يا بنسونى يا أعرج .. يا بنسونى يا أعرج)

(ويخرج صابر ويغيط بسيونى بأن يمشى مشية الأعرج وهو خارج)

بسيونى : غور فى داھية يا ابن العبيطة ... آل أعرج آل .. الوحيد فى البلد اللي لسه بيقولى الكلمة دى .. وحياة أمك

لمسيرى أخليك تبطل تقولها يا صابر الكلب ..

علام : ياالله بقى يا حاج بسيونى نسيب العرسان على راحتهم .. الف مبروك يا راوية

راويّة : الله يبارك فيك

(يخرج علام وبسيونى)

سلامة : (يتحدث وهو ينظر الى اللاب توب) أخيرا يا راوية جت اللحظة اللي إتمنتها من زمان ..

راويّة : لحظة ايه يا سلامة ???!!

سلامة : إن انا وانتى نبقى مع بعض لوحدنا تحت سقف واحد .. ومفيش حاجة تمنعنا عن بعض ..

راويّة : نعم يا أخويا ..سقف واحد ايه ... يا نصيبي .. يا بختي .. ده أنا بيني وبينك ما يقلش عن ألفين كيلو .. انت

عايش الوهم يا سلامة ..

سلامة : سيبيني أعيش الوهم شوية يا راويتي .. بأقولك ايه .. اعتبرى نفسك معايا دلوقت ... ماشى

راويّة : أعتبر نفسي معاك ازاي يعنى وأنا مش شايفة غير صورتك على شاشة قد كده .. لا حاساك ولا لمساك .. أنا

كان نفسي ليلة دخلتى دى تبقى زى كل البنات بحق وحقيقى مش شاشة وميكروفون .. يعنى كان فيها ايه لو

نزلت اتجوزت وسافرت تانى .. مش كان يبقى أحسن ..

سلامة : لو نزلت يبقى مش هأرجع تانى .. انتى مش عارفة حاجة .. هنا لو حد شبط فى الشغل مكانى يبقى عليه

العوض ... ماחדش بيبقى على حد هنا ..

راويّة : يا عم الأرزاق بالله كنت سلمها لله وارجع

سلامة : يا فرحتى .. نتجوز ونتبسط لنا شهر ولا اتنين وبعد كده أفضل طول العمر قاعد جنبك لا شغلة ولا مشغلة ..

راويّة : يا سيدى كنت اشتغل شغلانتك هنا فى مصر حتى لو براتب قليل بس كنا نبقى مع بعض

سلامة : بصراحة الشغلانة بتاعتى دى مالهاش سوق فى مصر .. مصر مافيهش طقطقة يا راوية ..

راويّة : طقطقة !! طقطقة ايه ???!!

سلامة : العينات فى مصر ما بتطقطقش .. وبعدين دى كلها عينات خشنة ومشققة ومالهاش فى الكلام ده

راويّة : طب ما كان ممكن أجيلك ونتجوز عندك ...

سلامة : انتى اتجننتى .. تيجى فين ... مستحيل تيجى دلوقت .. ماينفعش حد يعرف حاجة عن شغلى هنا

راويّة : ليه يا سلامة .. ده أنا هكون ساعتها مراتك مش غريبة عنك

سلامة : (بارتباك) طبعا يا روى مش غريبة عنى .. بس أصل الشغل اللي بأعمله هنا سرى .. بس أوعدك أول ما

اسيب الشغلانة دى وأشتغل شغلانة تانية هجيبك معايا

راويّة : انت أدرى بشغلك .. بس يكون فى علمك أنا ما وافقتش على الكلام ده الا لما وعدتني انك نازل بعد ست شهور

.. والله يا سلامة الست شهور لو زادوا يوم لهيقالى معاك تصرف تانى

سلامة : ان شاء الله .. بس خلىنا دلوقت فى اللحظات الحلوة دى .. ركزى معايا وأنا هأخليكى أسعد عروسة فى الدنيا

راويّة : يا سلام .. ازاي بقى !!

سلامة : غمضى عينيكى

راويّة : ايه هنبداها بالاستغماية ولا ايه !!

iCulture

سلامة : تصدقى فعلا فكرة ..
 راوية : هي إيه دى !!!?
 سلامة : إننا نلعب إستغماية .. بس فى مشلة
 راوية : مشكلة إيه !!!?
 سلامة : هنضطر نجيب أبويا عشان لما تستخبي يلاقيكى ..
 راوية : نعم يا أخويا .. أبوك!!!! ياك باو لما ينفخك .. هو انت جايبنى للاستخدام العائلى ولا إيه .. أنا متجوزاك انت
 بس ... فاهم ..
 سلامة : خلاص يا راوية ماتزعليش أنا كنت بأهزر معاكى .. وبعدين أنا عايزك تغمضى عينيكى مش عشان كده
 راوية : أمال إيه !!!?
 سلامة : عشان تتخيلينى معاكى دلوقت
 راوية : (تغمض عينيه) أهه غمضت
 سلامة : أنا فين دلوقت!!!!?
 راوية : ما انت متلقح على الشاشة أهه
 سلامة : لا يا راوية .. ركزى معايا .. اعتبرينى قاعد جنبك دلوقت
 راوية : هيه وبعدين ...
 سلامة : إنت جميلة قوى يا راوية
 راوية : بجد يا سلومتى
 سلامة : وحياتى سلومتك أنا ماشفت فى الدنيا واحدة أجمل منك
 راوية : كلامك حلو قوى يا سلامة
 سلامة : ماتجيبى بوسة
 راوية : لأ يا سلامة مش من أولها كده .. أنا بأتكسف
 سلامة : ده أنا جوزك يا عبيطة .. حد يتكسف من جوزة !!
 راوية : أصل أول مرة أبقى مع راجل لوحدى .. ومعانا انت .. ما اتعودتش على كده ..
 سلامة : يا عينى على الأدب والتربية .. عمرها ما اتعودت تبقى لوحدها مع راجل ..
 راوية : لأ .. أنا قصدى ما اتعودتش يبقى معانا انت ..
 سلامة : نعم!!!! يعنى كنتى بتقعدى مع رجالة لوحدكم !!!
 راوية : يا حبيبى ده كان أيام المراهقة .. مرحلة وعدت .. لكن صدقتى يا سلامة من ساعة ما اتخطبت لك وأنا ما
 أعرفتش راجل تانى غيرك
 سلامة : صحيح يا راوية
 راوية : وحياتى روح راوية .. وعيون راوية .. وقلب راوية ..

سلامة : طب هاتى ايدك
راوية : (تمد يدها باتجاه اللاب توب) أهه
سلامة : طب لو بتحبينى هاتى بوسة
(تعطيه قبلة على الهواء ثم يحدث إظلام على المسرح لثوانى معدودة ثم يظهران مرة أخرى)
راوية : يا خبر .. ده انت فصل ...
سلامة : أيوه يا حبيبتي سكتى ليه .. كملى .. راوية .. يا راوية .. يا نهار مش فايت .. انت فصل .. وده وقته !!!
راوية : أنا عارفة حظى الهباب ..
سلامة : (يتصل براوية من الموبيل) ألو .. راوية ???
راوية : أمال يعنى هتكون مين .. هى زفته
سلامة : بصى يا راوية ... أنا عايزك تثبتى على اللى وصلنالاه .. إوعى تفصلى .. أنا خايف ما أعرفش أجيب من الأول
.. خليكى على كده لغاية انت ما يرجع ..
راوية : حاضر يا سلامة .. وانت هيرجع إمتى
سلامة : ما أعرفش
راوية : ما تعرفش إزاي .. إفرض ما رجعت دلوقت أعمل ايه أنا بقى !!!
سلامة : معلش يا راوية استحملى وبعدين اللى احنا وصلنالاه ده يعتبر إنجاز نفتخر بيه .. لازم نحافظ عليه ..
راوية : طب افتخر يا حبيبى براحتك .. ياللى عملت اللى ماحدش عمله .. أمال لو كنت معايا كنت هتقول ايه .. صحيح
واحنا بنتسلى كده عما انت بييجى ... إنت كنت قتلتي إنك بعث حوالة و هتوصل يوم واحد فى الشهر... إنهارده
يعنى .. بسأل أبوك بيقول ما وصلتش ..
سلامة : يا نهار أسود ومطين
راوية : ايه يا سلامة أبوك سرق الحوالة ???
سلامة : إنتى قلتى انهارده كام فى الشهر !!?
راوية : واحد .. ليه فى ايه ???
سلامة : يا ليلتك السودا يا سلامة .. إنتى عارفة انت فصل ليه ...
راوية : ليه ???
سلامة : معاد دفع الفاتورة كان انهارده ونسيت أدفعها
راوية : يعنى ايه !!!
سلامة : يعنى مش هيرجعوا انت إلا لما أدفع الفاتورة
راوية : يا حظك الطين يا راوية
سلامة : بصى .. أنا هأروح بسرعة أدفع الفاتورة وأرجع .. خليكى زى ما إنتى .. أنا مش هتأخر .. حافظ على
الإنجاز يا راوية .. إوعى تتشتتى .. خليكى محافظة على اللحظة .. اللحظة دى تعبتنى قوى على بال ما

وصلتها .. كلها ساعتين بالكثير وراجعتك .. حافظى على الانجاز يا راوية
راوية : ما تخافش على إنجازك يا سلامة إنجازك فى الحفظ والصون ..
سلامة : حا ظى على الانجاز يا راوية



iCulture

32

Empowering creative minds

(منزل بسيونى ويظهر بسيونى وعلام ثم تدخل عليهم هارشا)

(تدخل هارشا)

هارشا : نمستى .. نمستى ..

علام : أهلا أهلا يا ست هارشا .. مصر كلها نورت ..

بسيونى : مصر مين يا متخلف إنت .. (يحدث هارشا) دى مش مصر بس .. دى ميت أبو العدل كلها نورت ..

هارشا : بهوت شكريا .. بهوت شكريا ..

بسيونى : يا مرحاب بالهند يا مرحاب .. بلد غاندى وشاروخان .. وأميتابتشان

هارشا : بهوت شكريا .. بهوت شكريا هاج بسيونى ..

علام : وياترى هتشرفيننا فى المأمورية دى قد إيه يا ست هارشا؟؟

هارشا : هو يادوب واحد شهر.. أجمع فيه كل البركات وبعدها سافر الهند

بسيونى : بركات !!! إنتى جاية تزورى الأولياء بقى .. وتاخدى البركات منهم ..

هارشا : ناھى .. ناھى ... إحنا نلم البركات من هنا .. من ميت أبو الأدل ..

علام : ميت أبو العدل !! وهى ميت أبو العدل فيها بركات !!!؟

بسيونى : دى فيها كتير كتير ألام .. إنتوا عندكم خير كتير بس مش حاسين بيه ..

بسيونى : خير !! يكونش ميت أبو العدل ظهر فيها بترول يا ولاد ..

هارشا : ناھى .. ناھى .. بلدكوا هاج بسيونى مش فيها بقر؟؟

بسيونى : (يضحك) إذا كان على البقر فبلدنا الحمد لله كلها بقر .. (ينادى ناحية الكواليس) تعالى ياى يا مرزوق

إنت وحسنين .. (يضحك) ..

(يدخل مرزوق وحسنين)

بسيونى : تعالى ياى يا بقره منك له (يضحك ساخرا منهم) ده إنتوا طلعتوا معروفين فى الهند ..

مرزوق وحسنين معا : عيبه (صوت أشبه بخوار البقر) صحيح يا حاج بسيونى ..

علام : البقر وعارفينه .. إنما البركات إالى هتلميها دى فىن؟؟؟

هارشا : بتاتا هو .. بتاتا هو ..

بسيونى : بتاتا هو ؟!!!!!!

مرزوق وحسنين : بتاتا هوووو .. بتاتاهووووو

بسيونى : إيه البتاتا إالى فيها البركة دى يا علام .. ماتفهمنا إنت مش بتقول إنك بتفهم هدى ؟!!!!

علام : يا حاج بسيونى بتاتا هو بالهندي يعنى سأقول لكم ..

بسيونى : (يتحدث إلى مرزوق وحسنين) بتاتا هو يعنى سأقول لكم .. ففهمتوا يا بقر .. إتفضلنى قولى يا ست هارشا

مرزوق وحسنين : بتاتا هوووو .. بتاتاهووووو

هارشا : أنا هعمل إتفاق معاكم .. إنتوا تجمعوا لى بركات أخذها صدرها الهند .. بعدين أنا إديكوا فلوس

مرزوق وحسنين : (يغوها وهم يرقصون) بتاتا هوووو .. بتاتاهووووو

بسيونى : وهى إيه البركات دى يا ست هارشا ???

هارشا : البركات هى البيبيه بتاع البقر ..

مرزوق وحسنين : بيبيه بتاع البقر !!! (يصدرون صوت البقر)

علام : يعنى البيبيه بتاع البقر اللى احنا لامواخذة بنقول عليه جلاااااش (يغمز بعينه وكأنه يقصد بالجلاش كلمة أخرى

(فيه البركة ???)

هارشا : ها .. الام .. ها

مرزوق وحسنين : (يفتحوا فمهم ويكرروا كلمة ها على إيقاع ثابت) ها .. هاها .. ههها هها ها

هارشا : (تتحدث إلى مرزوق وحسنين) أب تيك تى هو ??? أب تيك تى هو ???

مرزوق وحسنين : (مازالو على وضعهم ويكرروا نفس اللحن) ها .. هاها .. ههها هها ها

علام : ماترد يا بقرة منك له على مدام هارشا .. أب تيك تى هو ?? يعنى هل أنت بخير ???

مرزوق وحسنين : (يضحكوا بصوت عالى بطريقة آليه معا) هل أنت بخير ??? (ثم يكرروا نفس اللحن) ها .. هاها

.. ههها هها ها .. أب تيك تى هو ?? (بلكن فلاحى)

بسيونى : سيبك من البهايم دول وخلينا فى البركات .. يعنى هتدونا مقابل حلو قصاد البركة اللى هنلمها ???

هارشا : ها .. ها .. طبعا هاج بسيونى .. إحنا إدفع فى البركات كل اللى تطلبوه

بسيونى : خلاص .. من إنهارده كل واحد عنده بقرة فى البلد مسنول يجيب لى البيبيه بتاعها ..

علام : طب ولو البقرة عملتها فى الشارع يا حاج بسيونى ???

بسيونى : (يشير إلى مرزوق وحسنين) يبقى البهايم دول يلموهالى من الشارع .. فاهمين

مرزوق وحسنين : (يضحكوا وينظروا إلى هارشا) أب تيك تى هو .. أب تيك تى هو بسيونى .. وهنلم البركات .. هنلم

البركات

هارشا : (تنظر إليهما) توم باقل هو .. توم باقل هو ..

علام : يا خبر أبيض

بسيونى : إيه يا علام بتقول إيه !!!???

علام : دى إفتكرتهم مجانيين ..

مرزوق وحسنين : (يضحكوا) أب تيك تى هو .. أب تيك تى هو بسيونى .. وهنلم البركات .. هنلم البركات

بسيونى : (يحدث مرزوق وحسنين) مش عايزكم تسيبوا فتفوتة فى الشارع .. أقولكم الحقوها قبل ما تنزل الأرض

مرزوق وحسنين : (يضحكوا) أب تيك تى هو .. أب تيك تى هو بسيونى .. وهنلم البركات .. هنلم البركات

هارشا : (يبدو عليها مظاهر القلق) هم بريشان هو .. هم بريشان هو ..

علام : قلقانة !!! قلقانة ليه يا ست هارشا ..

هارشا : خايقة يغشونا ويجيبوا بيبي بتاعت جاموسة ..

بسيوني : لاا في دى اطمنى يا هانم .. أنا أقدر أميزهم عن بعض من أول شمة

مرزوق وحسنين : (يضحكوا) من أول شمة .. أب تيك تى هو .. أب تيك تى هو بسيوني ... وهنلم البركات .. هنلم

البركات

بسيوني : (يوشوش علام ولكن هارشا تسمعه) ما تسألها كده عن الهدية .. لتكون نسيته

هارشا : ناھى .. ناھى إنسى هدية ... الهدية جاهزة .. (تنادى ناحية الكواليس) سيكولالى .. سيكولالى .. ادخلى

سيكولالى

(تدخل سيكولالى وهى فتاة سيريلانكية وتدخل ملفوفة بالكامل بورق سلوفان (ورق لف الهدايا) ولا يظهر منها

سوى وجهها وتمشى بطريقة آلية)

بسيوني : إيه دى يا ولاد .. إيه السيكولالى دى ؟؟؟!!

هارشا : دى عروسة ليك هاج بسيوني .. عشان مراتك ماتت

بسيوني : يا حلاوة .. عروسة لى أنى .. ودى لعبة ولا حقيقية ؟؟؟

هارشا : لا دى حقيقية .. إسمها سيكولالى .. أصلها من سيريلانكا بس هى مولودة وعاشة فى البلد الللى اشتغل فيها

دكتور سلامة .. بس طفشت منهم لأنهم يا حرام إضربوهم .. إستموهم .. إغتصبوهم .. وفى الآخر إدموهم ..

مرزوق وحسنين : (يضحكوا) أب تيك تى هو .. أب تيك تى هو بسيوني ... وهنلم البركات .. هنلم البركات

هارشا : أنا رايحة شوف بقرات .. وأخد بركات .. كبى ألفيدا ناكهنا .. لا تقول وداعا ولكن إلى اللقاء

(تخرج هارشا)

علام : (يحدث سيكولالى) ومامتك وباباكي فى سيريلانكا ؟؟

سيكولالى : (تهز رأسها مبدية النفى) ناتا .. ناتا ... ماما عند دكتور سلامة .. وبابا بس هو الللى فى سيريلانكا ..

بقالهم ٢٥ سنة مش شافوا بعض

بسيوني : (وهو يغازلها) وعلى كده بقى الجميل عنده كام سنة ؟؟؟!!

سيكولالى : ٢٠ سنة

مرزوق وحسنين : (يضحكوا) ٢٠ سنة .. أب تيك تى هو .. أب تيك تى هو بسيوني .. وهنلم البركات .. هنلم

البركات

علام : (بانفعال) طب إزاي بس يا جدعان يكون عندك ٢٠ سنة وأبوكى وأمك ما إتقابلوش من ٢٥ سنة حد يفهمنى

!!!!!!

مرزوق وحسنين : (يضحكوا وكأنهم يغيظوا بسيوني) سيكولالى .. سيكولالى .. أب تيك تى هو بسيوني ... وهنلم

البركات .. هنلم البركات

سيكولالى : ظروف شغل ماما منعتها ترجع سيريلانكا

علام : طب وباباکی ما إضايقش أبدا .. ما حشش إنه عاوز ينتقم لشرفه ويموت أمك !!!!!

سيكولالى : لا خاص .. بابا مبسوط جداا من كده .. ماما تقول هو مش أخذ باله ..

مرزوق وحسنين : (يضحكوا) مش أخذ باله .. أب تيك تى هو .. أب تيك تى هو بسيونى ... وهنلم البركات .. هنلم البركات

بسيونى : خلاص بقى يا علام مالوش لازمة الكلام ده .. خليك معايا .. (يأخذه على انفراد) أنى عاوز أقولها كلمتين حب .. أنا حاسس إنى هحب على نفسى وأنا واقف يا علام .. روح إقف جنبها بسرعة وترجم لها اللي هقوله .. بس تترجم كويس .. يالا بسرعة (يتحرك علام ناحيتها)

علام : عاوز تقول ايه يا حاج بسيونى ..

بسيونى : (بالفصحى) أنت جميلة جداً

علام : (ينظر إلى عينيها ويتحدث وكأنه هو الذى يغازلها ومن الممكن أن يجلسا متقابلين ينظران إلى أعين بعضهما البعض) بهوت خب صورت سيكولالى ..

سيكولالى : (بخجل ممزوج بالدلع) شرما .. شرما ..

علام : مكسوفة يا حاج بسيونى ..

بسيونى : قولها ماتتكشفش

علام : بى شرم .. بى شرم سيكولالى

بسيونى : قولها شفايفك حلوة قوى

علام : (ينظر إليها ويتحدث بتلقائية وهيام دون النظر إلى بسيونى)

علام : الهونت ودكو قوى

سيكولالى : شرما .. شرما

مرزوق وحسنين : (يضحكوا) .. أب تيك تى هو .. أب تيك تى هو بسيونى ... وهنلم البركات .. هنلم البركات

بسيونى : وعينيكي حلوة قوى برضه

علام : أكيه ودكو قوى برضه

سيكولالى : شرما .. شرما ..

بسيونى : مش عارف من غيرك حياتى هتبقى عاملة إيه ..

علام : نى معلوم .. زندقى كوتش نهى ..

سيكولالى : شرما .. شرما

مرزوق وحسنين : (يضحكوا) .. أب تيك تى هو .. أب تيك تى هو بسيونى ... وهنلم البركات .. هنلم البركات

بسيونى : إن شاء الله فرحنا يوم السبت الجاى

علام : إن شاء الله الدولهن يوم الهفته

iCulture

بسيونى : (بانفعال) هفتة إيه يا علام .. مفيش هفتة فى الفرحة ... ولا كباب ولا بتنجان مشوى حتى .. احنا ناقصين

مصاريڤ

علام : لأ .. هفتة ده يعنى يوم السبت بالهندي يا حاج بسيونى ..

بسيونى : لأ .. ابعدا عن يوم الهفتة ده خالص لا الناس تطمع ولا حاجة .. خليه مثلا يوم التلات

علام : إن شاء الله الدولهن يوم منقل ورا

بسيونى : هو ايه اللي من ورا يا علام

علام : يا حاج بسيونى يوم التلات بالهندي يعنى منقل ورا ..

بسيونى : زى بعضه .. ورا ورا .. المهم نبعد عن الهفتة ..

سيكوالالى : (تقف فجأة وتمسك علام من يديه) علام ..

علام : نعم

سيكوالالى : (تتحدث بحب وهيام) بهوت بيار كرتى هو .. علام ..

علام : يا نهار إسود ..

بسيونى : إيه يا علام جرى إيه ???

علام : دى بتقولى بحبك يا علام

مرزوق وحسنين : (يضحكوا) ..آب تيك تى هو .. آب تيك تى هو بسيونى ... وهنلم البركات .. هنلم البركات

سيكوالالى : (تجرى خلف علام وتطارده) بهوت بيار كرتى هو .. علام ..

بسيونى : إنت علقت البت يا علام الكلب !!!

علام : والله ما علقت حاجة يا حاج بسيونى .. ده هى يظهر افكرت ان انا العريس من كتر ماقلتلهها كلام حلو ..

مرزوق وحسنين : (يضحكوا) ..آب تيك تى هو .. آب تيك تى هو بسيونى ... وهنلم البركات .. هنلم البركات

علام : (يجرى أمامها) العريس ايه .. أنا المترجم .. أنا المترجم ..

سيكوالالى : (ومازالت سيكوالالى تجرى خلفه وتلاحقه) بهوت بيار كرتى هو علام ..

علام : ياستى انا المترجم .. العريس ايه .. ديكى هو .. بصى له .. ديكى هو .. ديكى هو ..

مرزوق وحسنين : (يضحكوا وينظروا الى بسيونى بشماتة) ..آب تيك تى هو .. آب تيك تى هو بسيونى .. وهنلم

البركات .. هنلم البركات

iCulture

اللوحة السابعة

(منزل سلامة وتظهر راوية ومعها صابر)

راوية : عجبك كده يا صابر .. أكثر من تسع شهور عدوا دلوقت وسلامة مش عايز ينزل

صابر : (آه .. آجبني) (آه .. عاجبني)

راوية : وآخرة المتمة بأكلمه ما بيردش على .. خايف يواجهنى .. مالوش عين يقولى مش نازل ... ينفع كده يا صابر

صابر : (آه .. إنفع) (آه ينفع)

راوية : خلاص يبقى ما بدهاش بقى .. ماهو اللي ما يجيش باللين بيجي وعلى رقبتة السكين .. بصراحة ماعدش ينفع

أصبر أكثر من كده .. كان فيها ايه يعنى لوسمع الكلام ونزل ... مش كان أشرفلى و أشرفله .. ووفر علينا

الفضيحة .. صابر .. أنا مش مسامحة نفسى على اللي هأعمله .. بس ما باليد حيلة .. يظهر مافيش قدامى غير

الحل ده .. أنا بعث لأم جلال الداية وإن شاء الله هى الوحيدة اللي هتعرف تقوم بالمهمة دى

(تدخل أم جلال الداية وبداها مشمرتتين وتمسك بفوطه تنشف بها يديها)

أم جلال : والنبي أول ما جالى مرسالك سببت حنة الشغل اللي فى ايدى وجيت جرى .. خير يا راوية يا غالية يا بنت

الغالية

راوية : معلش لو كنت عطلتك عن شغل بس الموضوع خطير وما يستحملش

أم جلال : وأنى هاعطل لأعز منك .. دول أول ما قالولى راوية عايزاكى سببت البنية طلقها شغال وعندها بشاير ولادة

وجيت لك عطلول

راوية : طب إزاي .. واللى بتولد دى تقول علينا ايه دلوقت

أم جلال : ما يهكميش التلفون معايا .. قتلهم أول ما الراس تنزل يكلمونى .. المهم قولى لى ...خير يا ختى مالك ???

راوية : أنا واقعة فى مصيبة يا خالة أم جلال وماحدش هيقدر يساعدى إلا إنتى .. بس أمانة عليكى ماتفضحينى

وتصونى سرى

أم جلال : سرك فى بير ..ده إنتى زى بنتى .. خرى يا راوية وماتخافيش

راوية : بس أنا عارفة إنك بتروحي بيوت البلد كلها وخايفة لا تغطى بكلمة كده ولا كده قدام حد

أم جلال : يا ندامة .. هما صحيح الناس بتقول على إنى بأنقل الكلام بس انتى الغالية بنت الغالية .. ده معقول برضه

أفتش سرك إنتى .. والنبي ما يحصل أبداً .. قولى ياختى بسرعة قلقتينى

راوية : طب استنى أجبب للواد صابر حنة بسبوسة عشان يرضى يمشى ونتكلم براحتنا

أم جلال : إيوه صح يا ختى مشيه ..

(تخرج راوية)

أم جلال : (تتصل بالتلفون) ألو .. أيوه يا أم توفيق .. اسكتى ...مش البت راوية هتقولى دلوقت على سر خطير ما

يتلبس عليه هدوم ... ايه؟؟ ..لألسه.. خليكى جنب التلفون .. هكلمك أول ما أعرف ...

(ثم تتصل بنمرة أخرى) ألو .. أيوه يا أم سيد .. اسكتى ...مش البت راوية هتقولى دلوقت على حته سر انما ايه يودى فى داهية .. ايه؟؟ لأ لسه معرفتوش ...خليكى جنب التلفون ..
(تدخل راوية)

راوية : (تحدث صابر) خد يا صابر البسبوسة اللي بتحبها أهه .. يالا مع السلامة
صابر : (أنا حبك آوية) (أنا بحبك يا راوية)

راوية : يالا يا صابر مش وقته مع السلامة (يخرج صابر)

راوية : أمانة عليكى يا أم جلال ماتجيبى سيرة لحد على اللى هأقولهولك

أم جلال : أنا أجيب سيرة لحد !!!! ينقطع لسانى لو جنس مخلوق عرف حاجة منى

راوية : أنا ... أنا .. أنا حامل يا أم جلال

أم جلال : طب وفيها ايه مش انتى متجوزة

راوية : أيوه بس جوزى مالمسنيش .. ده متجوزنى وهو فى الغربية لا شافنى ولا شفته

أم جلال : يا فضيحتك

راوية : ساعدينى يا أم جلال .. أنا مش عارفة أعمل ايه فى الفضيحة دى وهو مش نازل دلوقت وبطنى بتكبر .. شوفى

لى حل الله يسترك

(يرن موبيل أم جلال)

أم جلال : ألو .. أيوه .. ايه؟؟؟ الراس نزلت .. ياختى هى مستعجلة على ايه .. خليها تستنى شوية مش فاضية

دلوقت .. (تففل السكة) (تحدث راوية) هو الواد صابر ببيجي كثير هنا ؟؟؟؟

راوية : (تهز رأسها بالموافقة وتنظر فى الأرض من شدة الخجل)

أم جلال : يا خيبتك يا راوية .. يعنى مالمقاتيش غير الأهل

راوية : يعنى هتفرق إذا كان أهل ولا عاقل ماهو كده ولا كده الفضيحة موجودة

أم جلال : طب ماتقلقيش اطمنى .. بأقولك ايه ياختى ...ماتخشى تجيبى لى حته بسبوسة نفسى هفت عليها مش عارفة

ليه

راوية : حاضر (تخرج راوية)

أم جلال : (تتصل بالتلفون) أيوه يا أم توفيق راوية طلعت حامل .. ومن مين .. من صابر الأهل .. زى ما بأقولك كده

.. بس والنبي ما تجيبى سيرة لحد .. آه احنا عندنا ولايا ...وإن الله ستار حليم .. مع السلامة

(تحدث نفسها) يخيبك يا راوية... ده إنتى طلعتى سهنة واحنا مش عارفين ...

أم جلال : (يرن تلفونها) ألو .. أيوه يا أم خالد .. أيوه ياختى اللى سمعته من أم توفيق صح .. راوية حامل من

الواد صابر الأهل .. مع السلامة دلوقت ...

(يرن تلفونها مرة أخرى) ألو .. أيوه يا أم طارق .. صح ياختى ... كل اللى سمعته من أم خالد ومن أم توفيق صح

.. آه حامل من الواد صابر .. بس اوعى تقولى قدام حد .. آه يا حبيبتي لازم نسترعليها أمال ايه ...مع السلامة

(تدخل راوية)

راوية : (تعطيها طبق بسبوسة) اتفضلى

أم جلال : تسلمى ياختى ... طيب انا هأمشى بقى عشان الحق الراس اللي نزلت دى وأبقى أرجعك

(تخرج أم جلال)

(يدخل علام وبسيونى وفهيم وحسنين ومجموعة من أهل البلد)

بسيونى : الكلام اللي سمعناه ده صحيح

راوية : وانتوا مين اللي قالكم !!!!!

علام : يعنى صحيح

بسيونى : آه يا فاجرة (ويهم ليضربها)

راوية : أنا ماحدث له ضرب على إلا جوزى فاهمين ولا لأ

علام : وانتى مفكرة ان جوزك بعد اللي حصل ده مش هينزل .. أنا كلمته يا هانم وقلته ... وزمانه فى السكة دلوقت

راوية : والله كتر خير انه جه على نفسه وهينزل .. طب والشغل اللي ممكن يخسره .. بصراحة مالوش حق ... ده

كلام .. انت مش عارف نزوله ده هتتكلف كام .. ما تقوله يا حاج بسيونى

بسيونى : اسكتى يا فاجرة وليكى عين تتكلمى بعد ما فضحتينا وخربتى بيتنا.. والله بس لما بييجى سلامة هيبقى لنا

تصرف تانى معاكى

علام : يالله بينا يا جماعة ندور على الواد صابر لازم سلامة بييجى يلاقيه متكتف بين ايدينا

iCulture

اللوحة الثامنة
(منزل سلامة)

سلامة : ياه يا راوية ... آخر حاجة كنت أتوقعها إنك تخونيني

راوية : إنت اللي بدأت يا سلامة

سلامة : أنا !!!! ده أنا عمرى ما حبيت حد غيرك .. اللي يحب عمره ما يخون يا راوية

راوية : لأ بيخون يا سلامة ... لما تقولى ست شهور بالطبط وهأنزلك وماتنزلش يبقى بتخون .. لما تتجوزنى وانت

فى تانى بلد وما أشوفكش غير صورة ببتكلم لا روح فيها ولا إحساس يبقى بتخون يا سلامة

سلامة : وأنا يعنى متغرب بمزاجى ماهو غصب عنى وبعدين العز والنغمة اللي احنا فيها دى ماهى ليكى قبل ماتكون

لى

راوية : ماكنتش عاوزة عز ولا نيلة أنا كنت عايزة الرجل اللي بأحبه .. كنت عايزاك جنبى ألمسك وتلمسنى ..

أبص فى عينيك وأعرف إنت عايز إيه من غير ما تتكلم ... أغسلك هدومك وأشم ريحتك فيها .. ولما ترجع

بالليل أدعلك رجلك بالمياه الدافية .. وأفضل أحبك على اللي حصل طول اليوم .. عارف يا سلامة .. أنا كان

بيمر على ليالى كل اللي نفسى فيه إنك كنت تنام على رجلى وأحط إيدى على رأسك لغاية ما تنعس وأفضل

قاعدة صاحية طول الليل ما أتحركش عشان ماتصحاش .. هتصدقنى لو قتلتك إنى كنت بأغير من العصفورة ..

أيوه ... كنت بأتمنى أبقي مكانها ... جوزها عمره ما بيفارقها بياكلوا سوا ويشربوا سوا ويناموا سوا ولو حد

فيهم بعد عن التانى وماعرفش يرجعه عارف بيحصله ايه .. بيموت .. بيموت يا سلامة .. احنا ما حصلناش

حتى العصافير يا أخی

سلامة : ما أنا لو قعدت جنبك برضه هنموت يا راوية .. هنموت من الجوع ومن اليأس .. هنموت من الفقر والظلم ..

أنا لما نزلت المطار حسيت ان فى حاجة بتخوننى .. حسيت بالخوف .. الغريبة انى ماخفتش من المستقبل .. لأ

أنا خفت لما افتكرت الماضى خفت ليرجعلى تانى ونرجع لأيام الهم والفقر .. حسيت إنى لازم أرجع وأسافر

تانى وأسبق الماضى اللي بيطاردنى قبل ما يلحقنى

راوية : من يوم ما سافرت وكل حاجة إتغيرت .. ميت أبو العدل ما عدتش هى ميت أبو العدل .. أنا عدت بأمشى جنب

الغيطان بأحس إن الزرع زعلان وزى ما يكون بيبيكى .. قربت منه وسمعت شكوته .. الزرع مش لاقى اللي

يرويه يا سلامة ... الزرع بيلومك انت وبيعتب عليك ... انت السبب فى كل اللي حصل لنا ده

سلامة : عندك حق .. أنا السبب .. هى فعلا غلطتى .. غلطتى انى بعدت عن أهلى وناسى .. سببت مراتى لو حدها

لغاية ما الكلاب نهشت لحمها ... غلطتى انى سببت الجنة وخرجت منها .. سببت الحياة الكريمة وفرص الشغل

الكثير اللي من غير واسطة .. وإتبرت عليها .. سببت الشوارع النضيفة والمستشفيات والمدارس اللي عليها

القيمة .. سببت النزاهة والعدل .. لا عمرى شفت دكتور بيعين ابنه دكتور على حساب حد غلبان .. ولا قاضى

بقى ابنه قاضى ولا ظابط طلع ابنه ظابط .. لا عمرى شفت أكل بيحب السرطان ولا طرق بتعمل حوادث .. لا

عمرى شفت هواء ملوث ولا مائة جابت لنا الأمراض .. سيبت النظام والاحترام والحرية .

سيبت أمى على فرشاة المرض وهى بتقولى سافر يا بنى شق طريقك .. ربنا معاك ، بس من جواها بتبكي وعينيها بتترجاني وتقولى إقعد ماتسافرش محتاجك جنبى .. أنا هموت وعايزاك انت اللى تدفنى .. مش عايزة الغريب يدفنى يا سلامة .. ومع ذلك عملت نفسى مش واخد بالى وسيبتها ومشيت .. سيبت كل ده عشان أروح أشتغل خدام عند واحد ميسواش .. (بسخرية) سيبت الجنة .. عرفتى ازاي أنا غلط .. بالظبط زى ما أبونا آدم غلط زمان وخرج من الجنة .. بس هو ندم واستغفر وتاب عشان يرجع لها تانى .. لكن صدقيني .. أنا مش هندم ولا هتوب ولا عاوز ارجع لها تانى .. عارفة ليه؟؟ لأن دى ماعدتش الجنة يا راوية .. دى ماعدتش الجنة ..

راوية : والسفر عمره ما كان الحل يا سلامة

سلامة : زعلانة إنى سافرت !!! بقى عندى عقارات ومحلات وفلوس فى البنك .. البنك اللى عمرى ما حلمت إنى أدخله قبل ما أسافر .. الناس بقت تحترمنى وتحترم أبويا بعد ما كان ملطشة لأهل البلد كلهم .. أنا دلوقت للازم لى زرع ولا يحزنون ..

راوية : الناس إتغيرت يا سلامة .. الوشوش ماعدتش زى زمان ولا الأكل ولا اللبس ولا الكلام حتى الطين عدت بأحس إنه لونه إتغير ... بقى أصفر وكله جفاف وماعدش حنين زى الأول .. أنا بقيت حاسة إنى فى بلد غريبة مش بلدى .. احنا بقينا نعيش الحياة مسجل مش مباشر .. بقت تتحكى لنا مش عايشينها ..

(تعمل حوار تخيلى مع نفسها وكأنها تحدث سلامة فى التليفون)

أنا تعبت انهارده والجيران ودونى للدكتور ...

والدكتور قال ايه ...

كتبلى علاج وبدأت أتحسن ...

طب ابقى طمئيني

حاضر ...

أخوك اتجوز وعمل فرح كبير ...

ابعتى لى الصور عشان أشوفه ...

حاضر ...

البيت بعد ما ادهن بقى جميل .. كان نفسى تشوفه معايا ونفرح بيه سوا ...

مش مشكلة صوريه وابعتيه لى ..

حاضر

إيه رأيك ألبس الفستان ده ولا ده ...

اللبسى اللى يعجبك فيهم ...

أنا عاوزة اللى يعجبك انت ..

صوريهم لى وأنا أختار ..

iCulture

حاضر ...

أقولك على حاجة غريبة يا راوية ..

قول ...

أنا بدأت أنسى ملامح وشك ... صوريلى وشك ...

حاضر ...

عارف حياتنا بقت عاملة زى إيه ??? عاملة زى فيلم جديد وقصته حلوة ومع ذلك بايخ و ممل ومالوش معنى .. عارف ليه .. لأن الصوت فيه كان سابق الصورة .. الفيلم أحداثه إتحرق زى ما حياتنا أحداثها بقت محروقة يا سلامة.

سلامة : وأنا عمرى ما نسيت بلدى ولا أهلى فى الغربة حتى الحب الوحيد اللى فى حياتى عمرى ما نسيت

راوية : ومع ذلك الحب ما قدرش يرجعك .. الإنتقام بس هو اللى رجعتك .. رجعت عشان تنتقم لشرفك .. ده حتى أمك

ماتت ما نزلتش تاخذ عزاها عيشة إيه دى يا أختى .. الحاجة الوحيدة اللى رجعتك هى الإنتقام لشرفك

سلامة : ما فيش فى حياتى أغلى من شرفى يا راوية

(يدخل بسيونى وعلام وفهيم والشيخ حامد ومعهم صابر مقيد اليدين)

علام : الكلب اللى خانك ومرمغ شرفك فى التراب أهه

سلامة : بقى أستأمنك على مراتى وأنا مسافر تقوم تخونى يا صابر

صابر : (حوة قوى) (حلوة قوى) (وينظر إلى راوية ويعطيها قبلة على الهواء)

سلامة : إخرس يا كلب والله لأخليك تندم على اليوم اللى اتولدت فيه يا أهبل يا ابن الأهبل (ويتحرك ناحيته ليضربه)

(يدخل عطية)

عطية : لا ... ده سيبهولى أنا .. أنا ما حدش هيشرب من دمه غيرى

علام : عطية !!!! إيه اللى جابك من السفر يا عطية !!!!!!! انت معاد أجازتك لسه ماجاش !!!!

عطية : العبيط طلع كان بيخونى مع مراتى و حياة أمه لأربيه

صابر : (ينظر إلى عطية) (تخينة قوى)

فهيم : (يضرب صابر على قفاه) اخرس يا كلب

(يدخل حسنى)

حسنى : بقى كده يا صابر يا أهبل .. ورحمة أمى لأموتك

علام : حسنى !!!! حصل إيه يا حسنى !!!! إيه اللى جابك انت كمان من السفر !!!

حسنى : الواد اللى عامل نفسه أهبل طلع بيستهبلنا احنا .. الكلب خاتى مع مراتى .. أول ما عرفت جيت على ملا وشى

عشان أنتقم منه

صابر : (ينظر إلى حسنى) (وحشة قوى)

فهيم : (يضرب صابر على قفاه) اخرس يا كلب

iCulture

(يدخل مجموعة من الشباب)

علام : الله الله الله!!!!!! ده البلد كلها رجعت من السفر!!!!!!

شاب 1 : (يحدث صابر) لازم أقتلك يا كلب

شاب 2 : هنسيح دمك .. وكل واحد منا يشرب شوية يا ندل ...

صابر : (ينظر إلى الشباب) (كتبير قوى)

علام : يعنى صابر الأهل علم على رجالة البلد كلهم وهما مسافرين يابن اللنيمة .. ده انت طلعت داهية .. طب مين اللي بلغكم بالكلام ده

عطية : أم جلال هي اللي عرفت الحقيقة وبلغتنا واحد واحد .. فى الأول لما عرفنا حكاية سلامة وراوية وأنه نزل عشان ينتقم لشرفه قلنا عليه ده طلع مغفل ومراته بتستغفله .. بعد شوية لقينا أم جلال كل يوم تتصل بواحد منا تقوله على اللي مراته عملته.. وعرفنا فى الآخر ان كلنا مغفلين .. العبيط طلع بيستغفلنا كلنا ... سيينا اللي قدامنا واللى ورانا ونزلنا عشان ننتقم لشرفنا

علام : طب وهي فين أم جلال ..حد يروح يناديها

فهيم : مش فى بيتها ..بقالها يومين بره البلد ... أول امبارح كانت مقابلانى رايحة ميت أبو العيش البلد اللي جنبنا .. بتقولى فى سنات بعتولها عايزينها هناك

علام : غريبة !!! دى عمرها ما ولدت حد بره البلد !! عايزينها فى ايه دى ؟!!!!

(يدخل عمران)

عمران : إلحقوا يا جدعان

علام : فى ايه يا عمران مالك

عمران : شباب ميت أبو العيش كلهم رجعوا من السفر وجايين على هنا عشان يموتوا صابر

صابر : (أنا خايف قوى قوى قوى)

بسيونى : يا بتاع الكلب ... ده انت مش أهبل .. ده احنا اللي هبل .. بقى تعلم على البلد وعلى البلاد المجاورة كمان

!!!!

(تدخل هارشا)

هارشا : منستى .. منستى ..

سلامة : الله!!!!!! إيه اللي رجعتك مصر تانى يا هارشا .. إنتى مش خدتى البركات كلها !!!

هارشا : ناهاى بركات .. أنا هنا عشان جوزى جاى مصر وهقابله هنا فى ميت أبو الأدل .. (بفرحة شديدة) أخيرا

هشوف جوزى .. بقلى سنتين مش شفته

سلامة : (بمنتهى الاستغراب) وانتو جايين من هناك مخصوص عشان تقابلوا بعض هنا فى مصر !!!

هارشا : أصل أم جانجا كلمته بالتليفون من الهند وضحكت عليه وقالتله إن صابر هيبنى قوى .. وأنا هبه قوى ..

وممكن نتجوز قوى قوى ..

علام : أم جانجا ؟!!!! أم جانجا مين ؟!!!!

هارشا : أم جانجا .. داية بتاعت الهند

بسيونى : حتى الهند مااعتقتهاش يا ابن المركوبة .. ده انت بقيت دولى

صابر : أنا خوش قوى .. أنا خوش قوى قوى قوى ..

بسيونى : تخش فين يا صابر الهم إنت .. والله ماھسيبك تخش

علام : لااا .. خوش دى يعنى مبسوط بالهندي يا حاج بسيونى .. يعنى ابن اللئيمة عاوز يقولك انه مبسوط قوى

صابر : (يرقص فرحا) أنا خوش قوى .. أنا خوش قوى قوى قوى ..

الشيخ حامد : لازم يترجم

الجميع : صح لازم نرجمه .. لازم نموته .. هنشرب من دمه

سلامة : استنوا يا جماعة ... كده فى حاجة مش مطبوعة

علام : حاجة ايه يا أستاذ سلامة ؟؟

سلامة : انتوا ناسيين ان صابر ما بيعرفش يطلع بره البلد لوحده ده لو عملها وطلع مرة واحدة مش هيعرف

يرجع تانى

علام : فعلا عندك حق .. آمال البلاوى اللي عملها فى ميت أبو العيش دى عملها إزاي ؟!!!!

سلامة : انتم مش ملاحظين ان كل الرجالة اللي حصل لهم كده كانوا مسافرين ورجع لما عرفوا اللي حصل

علام : أيوه صح

سلامة : يبقى ده ملعوب واتعمل فينا عشان نرجع لساتانا

علام : وأول واحدة عملته راوية ... ولما انت رجعت الستات كلهم قلدوها

فهيم : ده حتى البلاد اللي جنبنا لما عرفوا الحكاية قلدونا... عشان يرجعوا رجالتهم

بسيونى : (يحدث راوية) يا بنت الرفضى ... بقى تفضح نفسك وتفضحنا عشان جوزك يرجع من السفر ؟!!!!

راوية : ماكد ف د تانى ... ولا كنت عايزنى أفضل مستنية كده .. زوجة مع ايقاف التنفيذ

سلامة : أحمدك يا رب يعنى مراتى شريفة و ماخانتيش

أصوات تصدر من الجميع : الحمد لله ... ستاتنا طلعم كويسين .. ظلمناك يا صابر .. معلش حقك علينا

(تدخل سيكولالى ملهوفة باتجاه علام وبنفس الحالة التى أنهت بها مشهدها الأول)

سيكولالى : بيار كرتى هو علام .. بيار كرتى هو علام ...

علام : (يهرب منها) يا ستى أنا المترجم .. والله العظيم أنا المترجم .. ورحمة أمى أنا بترجم بس ..

بسيونى : (بحدة وإنفعال) سيكولالى .. تعالى هنا .. من إنهارده مفيش علام .. فيه بسيونى وبس .. مفهوم ..

سيكولالى : (تتحرك خاضعة ناحية بسيونى وتهز رأسها بالموافقة) هارى بسيونتى .. بيار كرتى هو بيسو .. بيار

كرتى هو بسيونتى الأعرج أبو رجل سليمة

بسيونى : (يضحك فرحا بنفسه)

iCulture

صابر : (يكلم سلامة) (سلامة .. انت اهل قوى قوى يا سلامة ... حد سيب ميت الأدل ولاوية وإمشى ..)

(سلامة انت اهل قوى قوى يا سلامة... حد سيب ميت أبو العدل وراوية ويمشى ..)

سلامة : وبعديهاك يا صابر .. ماعدش ليك دعوة براوية نهائى

راوية : ما تخافش يا سلامة ...اللى يحب ما يخونش ... والأصيل كمان ما بيعرفش الخيانة .. واحنا ستاتكم أصلاء

وبنعرف نصون الشرف .. بس انتوا كمان لازم تصونوا حياتنا وتعرفوا ازاي الحياة بتنعاش ... وماتبقاش

حياة مع إيقاف التنفيذ وطبعا انتم دلوقت عرفتم احنا ممكن نعمل ايه ..

علام : بس أنا عاوز أفهم حاجة .. بالنسبة لكى عارفينك .. طول عمرك تفكيرك غريب وعائشالى فى دور الرومانسية

وكان نفسك جوزك يقعد معاكى ما ينتقلش من جنبك ... انما بقيت ستات البلد طول عمرهم كانوا هما اللى

بيزقوا اجوازهم عشان يسافروا .. اللى عايزة تلبس أحلى لبس واللى عايزة يبقى عندها ذهب واللى عايزة

تتعايق قدام جيرانها ان جوزها مسافر بره .. ازاي تفكيرهم اتقلب وبقى زى تفكيرك ???

راوية : لما حكايتى اتعرفت ستات البلد كلهم استغربوا .. فيهم اللى صدق انى صحيح خنت ..ومنهم اللى ماصدقش ولما

قتلهم على الملعب اللى انا عملته استغربوا أكثر .. أول مرة يشوفوا واحدة عايزة جوزها يرجع ويبقى جنبها

.. اتكلمت معاهم وفهمتهم ان فى حاجات كتير أهم من الفلوس تستاهل ان الراجل يبقى جنب مراته .. فيهم اللى

اقتنع بكلامى ودول قليلين ..وفى منهم اللى كان على راسه بطحة وانا كنت عارفة اللى بيعملوه كويس ولما

هددتهم انى ممكن افضحهم خافوا منى ووافقوا على كلامى ...وفى ستات كتير نفسهم يعملوا اللى عملته بس

لسه الفلوس مزغللة عنيهم وعامياهم .. بس اظنوا من هنا ورايح البلد ماعدش فيها راوية واحدة .. لأ ..

راوية بقت فى كل مكان وفى كل بيت وبكرة تشوفوا راوية واللى زيها ممكن يعملوا ايه تانى عشان يحافظوا

على حياتهم ..

(يدخل رجل 2)

رجل 2 : إلحقوا يا أهل البلد حريقة فى دار صبرى عبد ربه .. إلحقوا ياجدعان الحريقة هتاكل البيت كله

علام : يا حول الله يا ربى .. ده كان معاد سفره بكرة .. كده مش هيسافر .. يقعد بقى يبني البيت من أول وجديد ..

iCulture

اللوحة التاسعة

(القرية وقد احترقت فيها كثير من البيوت وفي الخلفية أحد البيوت التي مازالت النار مشتعلة به وهو نفس المنظر باللوحة الأولى)

علام : ومن بعدها يا حضرة الوكيل ..زى ما يكون ربنا غضب على البلد من بعد اللي راوية والستات عملوه ...
وكيل النيابة : يا سلام !!

علام : آمال إيه ... ما صانوش النعمة اللي كانت فى إيديهم ..

وكيل النيابة : وغضب على البلد إزاي بقى !!؟

علام : كل شوية نلاقى بيت مولع ... وسبحان الله يطلع صاحبه كان هيسافر .. لما البلد كلها ماعدش فيها ولا واحد

عاوز يسافر .. خلاص بقت حالتنا ضنك .. أنى حالى اتوقف يا سعادة البية

وكيل النيابة : طيب ومفيش حد بتتهموه ؟؟؟

علام : بيقولوا فى واحد عامل عمل لكل واحد يبجى يسافر ... أول ما ينوى على السفر ... العفاريت تولع فى بيته

وكيل النيابة : العفاريت !!!!!

علام : آمال إيه ربنا يحفظنا ... لما شباب البلد كلهم بقم مرعوبين من حكاية السفر دى .. ومحدث عاد راضى يسافر

... شفت بقى وقف الحال اللي بلدنا بقت فيه ..مش هتعاين باقية البيوت يا بيه ؟؟؟

وكيل النيابة : لا خلاص يا أستاذ علام .. مالوش لزوم .. اجدعنا انتم بس عشان تفكوا العمل وتصرفوا العفاريت

علام : طيب انتوا هتتهموا مين فى المحضر يا سعادة البية ؟؟؟؟

وكيل النيابة : مافيش غيره ماس كهربى

ستار

حوار غنائى كوميدى يمكن أن يستخدم بديلا للوحة التاسعة

راوية :

ليه يا سلامة ؟؟؟؟؟

سلامة :

وأنا كان عندى بديل ورفضت

فعلا صح أنا اترمطت

صحيح دلكت

صحيح طقطقات

بس قصاها

iCulture

جبت فلوس كثير وقبضت
واللى يقولى انى اتهنت
وان كرامتى نزلت تحت
يجاوبنى بسرعة ودلوقت
وانت هنا كام مرة اتهنت ???

علام :

بس أنا نفسى أفهم حاجة
يا جماعة فهمونى .. يا جماعة فطنونى
الستات دول جننونى
طول عمرهم بيزقوا اجوازهم على السفر
ايه اللى جرى لمخهم ?? ايه اللى شقلب فكرهم ??
دلوقت صاروا هما اللى كارهين السفر !!
يا جماعة فهمونى .. يا جماعة فطنونى
الستات دول جننونى

راوية :

بص يا سيدى هفهمك ... وهقولك على اللى مجننك
انا لما حكايتى اتعرفت .. واللعبه خلاص اتكشفت
ستات كثير عاتبونى .. وعلى اللى عملته لامونى
كلمتهم .. فهمتهم .. عقلتهم
إن السعادة صعب تيجى بالبعد
وإن الجواز مودة .. وجعلها معاها رحمة .. حكمته رب العباد
تقدر تقولى ..

إزاي مودة واحنا متفرقين بين البلاد !!?
وهتبقى فين الرحمة بين عصفورين بعاد !!?
بس اللى لازم تفهموه .. وكمان تذاكره وتوعوه

ان البلد ماعدش فيها راوية واحدة
وان الحكاية مابقتش حكاية واحدة
فى كل يوم حكاية .. وفى كل بيت راوية

iCulture

وبكرة تشوفوا راوية .. واللى زى راوية .. ممكن يعمل ايه

كل اللى عنده بيت لازم يحافظ عليه

(توشوش الجمهور)

حت لو كانت الطريقة ...

حتى لو كانت الطريقة ...

اننا نعمل

(يدخل مرزوق) :

حريقة ... حريقة .. حريقة

الحقوا يا اهل البلد ..

حريقة فى دار صبرى عبد ربه

حريقة فى دار صبرى عبد ربه

علام :

ده معاد سفره يا عالم بكره

كده راح يقعد يحرس بيته .. يقفل بابه عليه بالأوكرة

(يدخل وكيل النيابة ويتوجه اليه علام)

علام :

ومن بعدها يا سعادة البيه ..

كل ما ينوى يسافر واحد

نلقى غضب ربنا عليه

فجأة نلقى بيته موع .. وبداية النار من جوه يا بيه

قالوا عفاريت وعمل معمول

للى مسافر يلمسه علطول

شدوا حيلكوا معانا يا بيه

اقبضوا لنا على ابن الايه

آه لو أشوفه وأعتر فيه

هقلب راسه مكان رجليه

حالى اتوقف يا سعادة البيه

جيبى مافيهوش ولا نص جنيه

iCulture

وكيل النيابة :
سكوت سكوت ... سكوت سكوت
بعد المداولة والمرافعة والشهود والاثباتات
بعد اللي جرى واللى هيجرى واللى راح واللى فات

الجميع :

هيبه؟؟

وكيل النيابة :

والتعب فات فات وفى ديله سبع لفات

(وكيل النيابة + الجميع) :

والتعب فات فات وفى ديله سبع لفات

وكيل النيابة :

سكوت سكوت ... سكوت سكوت

أقولكم مين اللي ظلم واجترى

أقولكم مين اللي ولع وافترى

الجميع : مين؟؟؟؟

وكيل النيابة :

المتهم مش هو ظلم ولا فقر ولا جهل

إوعاك تفكر انه بطالة او كسالة .. أو فساد أو محسوبة ..

المتهم هو ...

الجميع : مين؟؟

وكيل النيابة : هو ...

الجميع : ميين؟؟؟؟

وكيل النيابة: ماس كهربى ... ماس كهربى (وهو يرقص والجميع يرقصون معه ويرددون كلمة ماس كهربى)

iCulture

ستار

50

Empowering creative minds